

ASO FARAILE, 23 IANUARI 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: I le agaga faaaloalo tele i le paia ma le mamalu o le tatou Maota, ua tatou faatasi i lenei taeao fou, e le faaititia le agaga o le viiga ma le faafetai i le Atua. E manatu e le lilo, e le lanu, e le taui, ma e le mafai ona fataulia Lona alofa ma Lona agalelei na tatou tapa ai tulia i le tata ma o tatou sula le uluai asomualemalama ma ave ia te Ia le faafetai ma le faamanu. E manatu ua tatou toe potopoto faatasi i lenei taeao fou, ma e manatu ua fou mea uma. E faamalo atu i le tatou Maota i lenei vaega o le taeao, faafetai le onosai, faamalo le faapalepale, faafetai le usufono. E manatu o lea ua tatou taunu i le tatou aso mulimuli aua le faaaauauina aemaise le faatinoina o le tatou galuega pei ona faatulagaina i le Pepa o Galuega. E momoli atu ai le agaga faafetai tele i lau Afioga i le Palemia ma lau Kabeneta, aemaise foi le paia maualuga o sui usufono mamalu o le tatou Maota Fono, lau Afioga i le Taitai o le Itu Agai ma lea tala na atoa, malo le onosai. O lo o tatou faia pea le galuega ma le faanaunautaiga e talitonu i le tatou valaaquina, o la outou tofa saili ma la outou moe aemaise o le faautautaga oo, o sui lava ia aua le tapuaiga a si o tatou atunu i ona tulaga ma le mamalu sauoo i itumalo o lo o outou afifio mai ma tala mai aao.

E faafetai atu Samoa i lau tapuaiga, le paia maualuga aua Aiga ma Tapaaau, Faleupolu, alo mai i le tatou tapuaiga i lenei aso, e nono ni manu ma tatalo mai pea aua le feagai ai o le Palemene i lenei aso. Le Aufaigaluega Paia a le Atua, ia mana la outou upu.

TULAFONO TAU FAAOFI O LE FAATATAUINA O TUPE FAAOPOOPA (NU.1) 2014/2015 – felafolafoaiga faaaauau i luga o le fatauga faalua – Aso 4

FOFOGA FETALAI: E tolopo le tatou galuega i le aso ananafi ua lamalama faaiu le saunoaga a le Afioga i le Minisita mo Faatoaga ma Faigafaiva. Lau Afioga i le Minisita, tulai mai o lea ua maua lou laolao i lenei vaiaso e te...

Ia malie lava se i tuu atu le avanoa i le Afioga i le Palemia.

Susuga Hon Tuilaepa Fatialofa Luplesoliai Aiono Neioti Sailele Malielegaoi: Lau Afioga i le Fofoga Fetalai, e tatou te faafetai faatasi i le Atua e pei ona e ofoina atu ai le viiga i lenei taeao ua toe maleifua mai le Maota nei ma lau Afioga. O le aso foi lenei o le aso puupuu e uma ai le tatou galuega i le taimi masani o le 12:00 se i malaga atu foi tatou mai Salafai e auai i faigalotu o le vaiaso. O lea la e taumafai atu le matou pitolaau, ma le

faamoemoe a o le i break tatou mo le lunch ua maea uma a matou galuega, ua alofa tele atu i le galuega o lo o tauave e lau Afioga i lou taumafai mai e faafetai mai ia matou i taimi uma e uma atu ai matou lauga. Ia o le ala foi lea ua ou tulai atu ai e faamamaavega i lau Afioga, ona o le matau mai o lo o utiuti le taimi o le aso, ae soia ia e te saunoa mai o le a faapea lava ona uma le lauga a lea, ona faapena lava lea ona sosoo atu. O le matou vaega foi o le vaega faigaluega matou te le nonoi i ni faafetai ma ni viiga, ona e i ai lava upu foi nei e masani ai tatou, a uma ona fai o se galuega, e tasi lava Lē e ave i ai le faafetai na o le Atua, ae le faia i ni auauna, leaga o mea matou te faia, o mea lava e tatau ona fai, o matou o auauna, o vae ma lima o le Maota nei ma lau Afioga. O le ala lena o lou tulai atu e faamamaavega atu i le Nofoa.

FOFOGA FETALAI: Malo saunoa i lau Afioga i le Palemia. E fai foi o lena a o lenei. Ou te talitonu foi e le taia i fale lau Afioga i le Palemia ma Afioga i Minisita, e ave lava le faaaloalo i e ua tatau i ai le faaaloalo. Ia a tua ma ni a le 48 itula o outou faigaluega? O lea lava e mapu i le paolo le toatele o le Maota, ae le taia i fale. Lau Afioga i le Palemia, afai foi o le a se matou taumafai atu, e alu atu lava i le fatu. O le agaga ma le faamoemoe, ia a tua ma ni a le... O Lealailepule foi lea e tulai mai, e na o le faafetai faafetai i taimi uma. A o le agaga ma le faamoemoe, e le o se tulaga ona o se isi itu.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, o le agaga o lou sui usufono, ia uma e le i taina le 10, leaga o lau saunoaga faapea o matou o lo o mapu i le paolo. Lau Afioga, vaai mai i lou ulu, ou te faala mai le taeao e tau i le po ou te le ila i le tele o galuega. E feololo o na o le Malo, a o matou, o le Malo, o le atunu, o mea uma, o le Ekalesia. Faafetai.

FOFOGA FETALAI: Ia, o lou lauao e vele mai luga i le lagi. O le malosi o lou muga lea e mafua ai ona vave ona faaletonu lou lauao.

Ia alo maia le Kabeneta, ou te manatu ua maua le avanoa, tulai maia lau Afioga i le Minisita mo Faatoaga ma Faigafaiva.

Afioga Hon LE MAMEA ROPATI (Minisita mo Faatoaga ma Faigafaiva): Faafetai lau Afioga i le Fofoga Fetalai. Ma e le o toe umi foi se manatu o lena ua saunoa foi le Afioga i le Palemia, o le agaga lava lea e tasi, ia foi pea le viiga i le Atua i Lona alofa ma Lona agalelei ua tatou toe aulia mai lenei aso. Faafetai foi i le tapuaiga a le atunu. Ua maea atu le folasaga i le tele o mea ua tolaulauina ananafi. O le agai atu i luma, o le vaai agai i luma a le Matagaluega aemaise foi le Minisita, tatou o organic, o le mea lena o lea ua agai i ai le lalolagi, ua le toe manaomia le toe faaaoga o ni vailau, ae ua health conscious uma tagata. O Europe ua organic atoa. O le tulaga foi lena o lea ua tau agaigai i ai tatou. O le isi mea e lelei ai, e lelei le tau o faaeleeleaga. O le tau o le popo lea e i ai nei, e 12-13sene. Ae a faaaoga faa-organic, o se vaimea o le 24 i le 25 sene. O le eseesega lena. O aso la i le popo, na o le pau lava le mea sa faaaoga i ai o le copra foi lele o le popo e ave ai le suau i fafo. A o aso nei, o lea ua mafuli uma le tele o atunu i le mea o le VCO, Virgin Coconut Oil, e more healthier toe lelei e fai ai cosmetics ma mea faapena. O ananafi sa matou feiloi ai ma se kamupani mai Amerika o lea e fuafua e fia fai se latou factory i inei. O le tele o tatou VCO lea e fai i inei, e faafetai lava

i si vaega lea le Women in Business, o latou lava nei o lea e taimua i le VCO, i nai aiga foi nei e i tua o la e ua tufa atu i ai le faiga e fai ai ma gaosi ai le Virgin Coconut Oil. Ae na pau si ona faalavelave, e laitiiti le volume e mafai ona produce ae tele le anoano o tane ma tane o le oil lea e manao ai le tele o kamupani i fafo. O lea la e i ai le kamupani Amerika lea na matou feiloi ananafi, o lea e fuafua e fia fai se latou factory i inei i Samoa ma gaosi faa-commercial le oil. O la e la e galulue faatasi ma le Women in Business latou te.... Aua o latou lea o lea e taimua i le Virgin Coconut Oil ma le organic, i le tau faiga o se fuafuaga e fai ai le mea lea o lo o fuafua e le Kamupani Amerika lea. O le latou tala foi, e mafai lava ona oo i luga i le 30sene le tau o le popo pe a agai i ai. O le mea lena na afaina ai tatou i tausaga ia, leaga e alu i luga, alu i lalo le tau o le suauu popo. A o le taimi la lenei i le oil lea, e le alu i lalo alu i luga, e tumau po o le alu foi i luga. O le vaai lena i luma. O lona uiga o le mea lea e taumafai atu, e toto le niu, toto ia tele le niu. O le mea lea e i ai nei ua paoga le tele o tatou niu. O aso o Siamani, o le tele o niu sa i le STEC ua tuu i lalo e tagata, e faapena foi tagata ua faaaoga niu e fai ai papovi ma mea na. A o le taimi lenei, o lea ua taumafai lava le Matagaluega e push lava, e toto le niu. O le isi itu lelei o le niu, e 60 i le 80 tausaga o fua lava le niu, e maua lava le popo i taimi uma, e le pei o le talo ma isi faaeleeleaga e ono masina, fitu masina, valu masina uma, toe fai. So o le fast crop po o le talo, o le niu lava, o le vaaiga lena mo le tatou lumanai. Ia, ua maea ai i i lau folasaga lea na fai ananafi, ma ou te iloa foi ua tali atu ai le tele o a tatou fesili ia na fai, vagana nisi o fesili i le mea lea o le matching grant. O le aofai o le aufaifaatoaga lea ua maea ona approve ua uma ona avatu i ai le faamanuiaga, o le manupapalagi e 110, o le fruits and vegetables e 50, poultry – o moa e 12, o puua po o mea fafaga e 28, mamoe e 10, faatoaga bee-keeping e 1, a o lea la e faagaoioi nei la le isi 96, e taumafai lava ina ia vave ona gaoioi aua o lea ua mautu uma mea, e le pei o le mea sa i ai muamua sa tau sue mai tagata e faamasani, a o lea la ua masani, ua le tatau la ona toe tuai. O le tupe lea ua alu nei i le taimi nei e \$1,437,980, o le tupe lena o lea ua faagaoioi.

O le tatou vaega lea o le cyclone recovery, ua alu foi i le atoa le mea lena aua o la e ua mautu.

FOFOGA FETALAI: Malie lau Afioga i le Minisita se i tuu atu le avanoa i le Afioga i le sui usufono mammal mo Faleata Sasae.

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetralai, ma le faaaloalo tele i le saunoaga a le Afioga i le Palemia e i ai lava le fesili lea i le mea lea e fia faamalamalama. O lea ua saunoa le Afioga i le Minisita ae sa tuu lava e leai se fesili e faia i le vaega lea, a o lea ua saunoa e \$1 miliona lea ua faaaoga i le seleni lea. o le seleni lea e \$32 miliona, a o le tausaga mulimuli lenei e maea ai le polokalame, a o lea ua saunoa le Afioga i le Minisita... O lau fesili la po o le a le faatinoina o le isi vaega lea e totoe o le seleni lea.

FOFOGA FETALAI: O lea ua maua le finagalo o le sui usufono. Tulai mai lau Afioga i le Minisita.

Afioga Hon LE MAMEA ROPATI: O le matching grant na o le \$8miliona e le... e \$32miliona le aofai o le project atoa, e 30% o le... na o le \$8miliona le mea o le matching grant. A o le vaegatupe lea ou te talanoa atu ai o le matching grant, aua o le mea lea o lea e ave, tusa e 50% le grant, ma pei ua uma foi ona ou fai atu ai, a o lea foi tatou te agai o lea e tau tipi le tatou taimi ae na o le \$8miliona e le \$32miliona. O le \$32miliona o le aofai lena o le tupe o le mea atoa. O le mea lea o le Cyclone Recovery, sa faatuai foi ona o le system le mea lea o le electronic voucher system foi lea e faatau mai ai mea i faleoloa, masalo o nisi o tatou lea ua faamanuia ai i le mea lea i le taimi lenei, o le vave ia. E faaui mai i lau telefoni cellular, na o le sau lava o le text i totonu toe alu atu ave i le Matagaluega aumai le mea lena pei se peni, e alu loa ave i le faleoloa faaaoga e latou, e leai lava se umi. O le aofai la o tagata lea ua i ai, i le faaiuga o Setema i le tausaga lea na tea na fai ai le trial run o le mea lenei, e 100 le aufaifaatoaga. Oo atu loa ua lelei, Oketopa 300, Tesema 999, Ianuari i le tausaga nei e 1,070. O lea la e faagaoioi nei le isi 1,000+, ua vave foi la le alu a le mea lena, o le tatou system lena ua i ai nei i le faagaoioiga, o le tele o tagata ua fiafia na o le o atu lava lau mai uaea o papovi ma uilipaelo; so o se ituaiga mea eseese.

O le fesili i pusatalo; i le 2011 – containers e leai se mea. O le 2011 lena ua amata tatou polokalame e toe faalelei ma toe sue maketi i fafo e ave i ai le talo. 2012 – 15 containers, 2013 – 25 containers. O le tausaga lea na tea nei, e 82 containers, o lona uiga o le tausaga lenei ona o lea faatoa amata, o lona uiga ua alu lava i luga ia le aofai o tatou mea ia e ave i fafo mo le talo.

O le fesili a le....ia e le o i i foi le sui usufono lea sa i ai lana....e manatua foi le tatou Matagaluega o le service provider, provide le service, i mea ia sa saunoa foi i ai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi e uiga i lana togaulu ma mea o koko ia na treat e le Matagaluega, ia o le agaga tonu lava lena o le Matagaluega, a i ai ni mea faaletonu pe o ni mai o ni laau po o ni faatoaga kapisi po o a, na ona telefoni atu lava i le Matagaluega o la foi ua uma ona set le matou system tusa pe e te vili mai i i le ofisa e le umi lava ae maua atu, po o fea le tagata la e i uta i le faatoaga kapisi, o i ina e tali atu ai au fesili ia ma sauniuni i ai. O le vai lea o le mea o le co-seal mo le fana decide,ia lea na fana ai le togaulu lea na fana ai le togaulu lea ma le togakoko a le toeaina lea, ia lea la ua toe lelei. A i ai lava la ni mea e fia manaomia nisi pei o le faataitaiga o le tosoga o le pa uaea o le pa povи, pa moa, pa puua, vaeane lava le paia o le Maota, na ona telefoni mai lava i le Matagaluega o atu faasino atu le faiga o le mea ma fesoasoani atu tama. E faapena foi mo talo, e tele lava o pusa talo ia e fai nei, ia ua fufulu ma faamama e le Matagaluega, ia se i masani lelei le au exporters ia ua i ai, ia ona tuu atu foi lea i tua, o la ua amata ona tuu atu i tua. O le eseesege o le fuainumera lea a le Stats ma matou i le mea lea o le census lea na fai o povи, o le mea na tulai, matou te lesitalaina uma lava le aufai pa povи i Upolu ma Savaii, na o uma la le matou Matagaluega tusa e sili atu i le tolu masina o feoai e tusi mai le fuainumera o povи, ia e le pei la, ou te le iloa la po o le a le system a le STATS na fai, ailoga latou te silafia uma pa povи, e oo foi i le mea lea o le tau o mea i le maketi, ia na o le o atu lava tilotilo i le maketi, ae le taamilo e toatele mau tamai fale o maketi la e i tua, e le taufaaleaga la se isi i ai, pau lava o le eseesege o Matagaluega ae eseese foi a latou systems, ou te iloa e more accurate atu matou, leaga o matou lea e deal

ma faifaatoaga o lea ua matou lesitala uma, matou te iloa uma lava faatoaga fai moa, pato, povi, puua ma so o se ituaiga mea.

FOFOGA FETALAI: Malie lau Afioga i le Minisita, se i tuu atu le avanoa i le faauilavea a le sui usufono. Tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, e taua le mea lea ua saunoa i ai le Afioga i le Minisita aua sa laga e le Komiti o lea e faafogfa mai le Afioga i le Minisita, o le Tulafono lea na aumai nei a le STATS, e tai sefulu tausaga ma fai le latou faitauga aofai lea o faatoaga, sa ou fesiligia, po o le a le mea e fai faatasi ai ma le Census e tai lima tausaga, a tai sefulu tausaga ma foi, ua mamao tele? Ma le faaaloalo lava.

FOFOGA FETALAI: Malie lau Afioga i le Minisita, se i tuu atu le avanoa i le isi sui usufono o lo o fia faamalamalama. Tulai mai le sui usufono mo Aiga i le Tai.

Susuga Ifopo Matia Filisi (Aiga i le Tai): Faafetai lava lau Afioga i le Fofoga Fetalai, leai ou te le fia faalavelave foi, ae pau le mea ua maua atu i le Minisita, ou te faamalulu leai o lea ua maua atu le mea lea sa ou lauga ai le mea lea o le Cyclone Relief, lea na ou talanoa ai, o le tatalo ia le pe lavea le motu lea o Manono lea e na o le lua lava vaa na faaleagaina i le matagi lea i le polokalame lea o le Cyclone Relief? Ma le faaaloalo lava, faafetai.

FOFOGA FETALAI: Ia tulai mai lau Afioga i le Minisita e faaauau le saunoaga.

Afioga Hon LE MAMEA ROPATI: Faafetai i le fesili a sui usufono mamalu. Sa saunoa le sui usufono faapea sa o se la asiasiga ma se Minisita i fafo, sa ou nofo lava au e asiasi vaa ma mea na, ia ou faapea, e le o au lea e agai mai i ai le sui usufono, aua ou te le o manatua na ma o ma le Afioga, ae o lea faatoa maua mulimuli ifo ai na malaga ma le Afioga i le Minisita mo Galuega, Felauaiga ma Atinae Eseese.

Ae mo le faamalamalama o le mea lea i lau Afioga i le sui usufono mamalu, o le Cyclone Relief mo faatoaga, a, o mea ia e te saunoa mai i ai, o vaa foi ia na faaleaga i le taimi o le Tsunami, ia ou te taunuu atu la i le ofisa o la ua uma ona faamaumau aua manatua o le 2009 na tupu ai le Tsunami, masalo o le mea tonu lena na faaleaga ai vaa. O le mea la na tupu, e sue atu e le matou Matagaluega, ua omai claim mai vaa ae sue atu e leai ni vaafagota faapea i totonu o le lesitala a le Matagaluega, suesue atu mulimuli, ae fai mai latou o vaa foi ia e feaveai ai ia pasese. E ese la mea e tau o le vaa laupasese, ese le mea e tau o le vaafagota, a? O matou o le Matagaluega o Faatoaga, Faleoloa o Faatoaga ma Faigafaiva, a le lesitala la lou vaa e fagota, e le lavea i lalo o le polokalame, ae a lesitala laupasese, ia o lena. O le mea lea e.....

FOFOGA FETALAI: Malie lava lau Afioga i le Minisita, sei toe tuu atu lava le avanoa, o lea e fia faamalamalama mai e laupasese toe fagota le vaa.

Susuga Ifopo Matia Filisi: Faafetai lava. O lea lava ua manino le faamalamalamaga a le Afioga i le Minisita, leai ae ona ou te talanoa lava i le mea moni leai e le o le Tsunami lea ou te talanoa ai, o lea ou te talanoa i le Afa o Eveni, e leai lava ma se mea na faaleagaina a Manono, e na o le lua lava vaa sa ato i luga e le galu ma faaleaga, e pau lava lea o mea sa faaleaga i Manono i le Cyclone lea o Eveni, pau lea, o lea foi e malamalama i ai le Minisita sa ma malaga, ae ou te malamalama foi i le Tsunami ma ona polokalame, ma le faaaloalo lava, faafetai.

FOFOGA FETALAI: Ia tulai mai lau Afioga i le Minisita.

Afioga Hon LE MAMEA ROPATI: Ia o le mea tonu lava na, o lona uiga o vaa na e te saunoa i ai, o vaa foi lea e lau ai pasese. Aua o le mea na tupu, o le faalavelave ia o vaa a lou itumalo, aua manatua o le matou ofisa e lesitala ai vaa foi ia alia e o e fagota, a o le faalavelave la o vaa la e maua mai i o, a fai atu i ai e lesitala a outou vaa o vaa fagota, ae fai mai, se leai o matou o vaa foi ia e felauai ai pasese mai Manono i Upolu, ia a tupu loa mea faapea, te i lava ua liu faa-vaa fagota, ae le o ni.....talui ai le taumafai e dots le totogiina o le laisene foi lele aua e \$100 e oo i le \$200 e fua i le umi o lou vaa, ae malie maia le sui usufono, I think ua uma ona sought out le tatou mea lena. Ae na ona faamalamalama atu, tau la i lou itumalo a faapea e lau pasese, e tatau foi la ona alu i le lesitala aua o la foi e maua atu o la e fagota i isi taimi. Ia ua maea le tatou mataupu.

Ia manuia lava lenei aso ma le tatou Fono, faafetai foi i lau Afioga i le Fofoga Fetalai le lavapapale foi aua ia nisi o fuafuaga, ae tele lava nai mataupu, ia a o mea taua ma le anoa na ua tau atu, e taatia nisi mea tatou te talanoa ai i tua. Ia faamanuia le Atua i le tapuaiga a Samoa, faamanuia foi i le usuia o le tatou Fono i lenei aso, faafetai ma le faaaloalo.

FOFOGA FETALAI: Malo faafetai, faafetai i le saunoaga a lau Afioga i le tama matua, o le matau foi lea sa i ai ananafi, o le tele lava o faafesili a sui usufono, ia ua maea ona tali, ia ae lafo atu pea i a outou Afioga i Minisita o lo o i ina le uta a le faimea e tulituli ai le tatou taimi, e pei ona saunoa le Taitai o le Malo. Faafetai saunoa, faafetai foi mo galuega a le Matagaluega.

Ia lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai, tulai maia ua oo i le taimi o le tatou Matagaluega.

Tofa Hon TOLOFUAIVALELEI FALEMOE LEIATAUA (Minisita mo Tina ma Tamaitai, Atinae o Nuu ma Afioaga ma Agafesootai): Faafetai i lau Afioga i le Fofoga Fetalai, e faatalofa atu foi i lau Afioga ma le paia i le laulau, o le talosaga foi na molia i lenei taeao, ia fofoga pea le Atua ia logomalie i le faafofoga a le atunu foi ma avea ma ala e faamalosiau ai le tatou Fonotaga nei, le afio atu o le Taitai o le Malo le Afioga i le Palemia, faapea foi lona auvaa, Afioga i le Tamaitai Minisita faapea foi alii Minisita o le Kapaneta, e le gata i lea o le mamalu o Minisita Lagolago, pei lava ona taoto ai ia Taualumaga o le tatou galuega faapulega Malo i lenei vaitau.

Ia le afio o lau Afioga i le Taitai o le Itu Agai, ae faapea foi le mamalu o sui usufono mamalu o le Palemene o Samoa, ia o le paia na o le atunu, o lea ua fai mai ia lo outou paia o lupe lava e fai mai i le fufifui, aua lava ia fuafuaga mo le lauiliuina ma le liliuina o le tofa i le faatuatuaga o le atunu ua tuuina

mai lo outou paia ma lo tatou mamalu o sasao nei, ina ia manuia Samoa, o le faamoemoe lena e tasi.

E talitonu foi e le o se ai avea pe a le oo so matou leo i le auiliiliina o sa ma paia o le atunuu, ia ae tau ia ina ou faapea atu, le Tafatolu o le faafeagai o le Faigamalo mai Lana Afioga Mamalu, O Le Ao o le Malo se i oo lava i Auauna o lo o latou galulue mo le tautuaina o Samoa, e faapea foi ia le Faamasinoga i le Faamasino Sili ma le paia o latou foi vaega i tulaga o le tautua i le atunuu i le Faamasinoga ma Pulega Tau Faamasinoga, o lea foi e ee foi lau Afioga i le Fofoga Fetalai o le Palemene lava lea o Samoa.

Ia le paia o le Tafatolu faafeagai o le atunuu ia Taitai o Ekalesia Kerisiano e fia, e faapea foi sa ma paia faale-Malo, a o le mamalu aua lo tatou atunuu i ona tulaga faalupe o Aiga tau tupu ma Aiga faalagilagi, ia o le faafeagai lava lea o le Aiga Sa Malietoa ma le Aiga Sa Tupua, ia o Aiga tetele na o Samoa, aemaise lava le paia o Aiga e fia, ia la oulu tausiga le Usoga a Pule ma Tumua, Ituau ma Alataua, Aiga i le Tai ma le Vaa o Fonoti, ia ou te talitonu lava o sa ua taoto a o se alaoo. O paia o Samoa ua uma ona tofi, ou te talitonu e le afaina ai se faamoemoe o lenei taeao pe a le oo i ai so matou leo i na mamalu ma na sa, i se iota e faaopoopo po o se iota foi e toesea, aua o lena ua uma ona taoto matamaga upu o le tatou atunuu.

Ia le paia o lenei taeao ou te tulai ma le agaga faaaloalo e fai ma sui o le Matagaluega o lo o i lalo o le matou vaavaaiga ma le faamalu o le Minisita mo Tina ma Tamaitai, Atinae o Nuu ma Afioaga ma Agafesootai, o pulega faalotoifale o alii ma faipule faapea foi sui o nuu ma sui tamaitai o le Malo i totonu o afioaga, e le gata i lea e aofia uma ai lava tagata o Samoa, aua ia komiti e fia o lo o faapena ona filifilia e lo tatou Malo, e le gata o le Komiti o le Faleula a o le Komiti o lo o silasila i le atinae o afioaga ma alaalfaga, po o Komiti o Pulenu i Upolu ma Savaii, ae faapena foi i Komiti o Tamaitai. O le mea la lea i lenei taeao e tulai ai ma le faaaloalo e faatalofa atu ai i ia foi itutino o le tatou Malo, e le gata i lea o le Komesina o Sulufaiga, aemaise foi o le puipuiga o aiatatau a le tatou atunuu e pei ona faaaopoopo ina ua tuanai le Tulafono na pasia e lenei Palemene i le tausaga ua tuanai, o lea foi ua faaopoopo ai ia galuega fai a le Afioga i le Komesina o Sulufaiga o aiatatau, ia ma le silasila totoa mo faafitauli ma faasea e tulai mai i le mamalu o le atunuu, ae faasaga i le malu o le Malo. Ia o na tofiga ma na faaopoopoga o galuega fai ma tiute tauave, ia e leai e talitonu lava, o le faamoemoega lea o le tatou Malo ia manuia Samoa ma tatou soifua i se soifuaga filemu ia ae a le vafealoaloai ma tulaga ia malupuipua tulaga uma lava o galuega fai a le atunuu e ala i le soifua maloloina, e faapea foi le tausisia pea o le nofo lelei o tagata soifua uma i totonu o afioaga ma alaalfaga, e oo lava i le atinae o Samoa, o lo o galulue ai le Ofisa o Faatoaga ma isi Matagaluega, o le taunuuga lava, o le galuega fai a alii ma faipule. A malu i totonu o afioaga, o le taunu lelei foi lea o fuafuaga a lo tatou Malo i le atinae aemaise o lona tamaoaiga.

O tulaga foi i le faaaogaina o le tofi o sui o nuu ma sui tamaitai o nuu, ia e afua atu i isi Matagaluega o lo o moomia lea auauaunaga, na ona totogi e le Matagaluega o Tina ma Tamaitai ae tele lo latou sao i ia foi vaega o le atinae o Samoa.

O le mea la lea a o faafogafoga mai le paia o le atunuu i o outou sa, paia ma mamalu i afioaga ma alaalfaga, o le agaga faafetai ia te au nei e fai ma sui o le Palemia ma le Kapeneta, e momoli atu le faafetai i lena tausaga i a outou

galuega fai ma le faatuatuaga ua tuuina atu e lo tatou Malo, o lena ua outou galulue punouai ma tautua Samoa, a o le taunuuga lava ia manuia lo tatou atunuu atoa i ona tulaga e i ai lona atinae ma le tamaoaiga. O le mea lea e momoli atu ai le faafetai i lo outou sao ma lo outou gapatia, e le gata foi i lea a o fuafuaga uma a lo tatou Malo mo le faaleleia o Samoa i lona lotofale mai i ona aao i le faasolo mai sisifo se i oo i le itu i sasae, ua talitonu lo tatou Malo i lo outou lagolago malosi aemaise le Fonotaga tele a le SIDS, ua tuu ai Samoa i luga o le kelope, ona o le matagofie ma le lelei ma le filemu o ona tagata soifua. E afua ia mea uma o le maopoopoga o le pulega a alii ma faipule i totonu o afioaga ma le lagolagosua a le itupa o tina ma tamaitai, aua le faamatagofieina ma le faaleleia o mea uma lava e tau i lo outou soifua lelei ma le soifua maloloina. O le mea la lea, ia saga faamanuia le Atua ia te outou i la outou tapuaiga, aemaise foi o a outou galuega fai. O lea ua outou faafogofoga mai i le molimau a le Minisita mo Galuega, Felauaiga ma Atinae Esesei i tatou atinae i totonu lava o tatou nuu taitasi, i auala galue ua le o lelei le vaaiga. O le mea lea sui o le nuu, a o outou faafogafoga mai, fai sa outou galuega. E oo foi i lo matou nuu, a o faafogofoga mai le pulenuu, ia tautuana, o auala e le itiiti ni tupe na alu ai a le tatou Malo, ae mo le tausia, le faaleleia ma le teuteuina, o le umi foi lea ona faaaoga ma lelei mo le feafioai ai i luga o taavale, aemaise foi o le taimi e tupu ai ni faalavelave faafuasei pei o Tsunami, o auala lava ia e faamoemoe le tatou Malo tou te faaaogaina ai a outou taavale ma meatotino e sulufai ai i nofoaga maualuluga e pei ona i ai polokalame fai a le tatou Malo.

Le itupa o tina, o lena foi ua outou faafogofoga mai i le Minisita mo Faatoaga ma Faigafaiva ua taua se tasi o Faalapotopotoga Tumaoti, le Women in Business, e ese le taua o la outou galuega ma le lagolago i polokalame a le tatou Malo, e le gata o le polokalame mo faatoaga o fualaa aina ma isi galuega fai faapisinisi, a o le tulaga o le ie Samoa e pei ona i ai la outou lagolago malosi. O lea ua maua toetoe a sefulu vaega o faalapotopotoga po o fale lalaga i matuauu ma le au seepapa ua ausia le matatia lea e faatosina atu ai le tatou Malo ia outou ausia lea vaega taua o le 10 ie iniini o le tosi tasi, e ese le manaia o lena faiga. I asiasiga a le tatou Matagaluega, e momoli atu ai le faafetai i la outou itupa i tina ma la outou fatuaiga tausi, na o le Atua e i ai la outou faamanuiaga. Ma e pei ona saunoa se tasi o Minisita afai e le o lo outou taimi, ae o fuaga o lalovaoa ma tupulaga fai mai e manuia i a outou galuega fai ma mea ua outou faataoto, e le gata i le galueaiina o le laufala mo le toga, o le ie o le Malo po o le iniini po o le ie Samoa, a o le lauua foi ina ia toaga e toto aua le siapo ua tau mou atu. Ia o faiga faavae na a le tatou Malo ia uunaia lea vaega o le tamaoaiga, e le mo le Malo ae mo le faamanuiaina o outou lava i tupe e maua mai ia vaega o atinae e i ai le siapo ma le tatou ie o le Malo.

Ae ua faaumiumi sau tala i le vaega lea, ona e leai ma se isi na saunoa i tulaga o le Matagaluega. O lona uiga, afai ua le afea i se finagalo o se sui usufono, o lona uiga o lo o lelei osiosi le tatou va aemaise ai le galuega fai a le Matagaluega, vagana le sui usufono mai Salafai se tasi o sui usufono mo Salega, Afioga Afualo Wood Utu Salele, e le mafai ona faagaloina sou finagalo ua lafo mai i le tulaga o faamanuiaga mo sui o le nuu e faapea foi sui tamaitai. O le mea foi lena o lo o taumafai i ai au nei ma le Matagaluega. E le faagaloina le galuega e pei ona outou faafogofoga mai, e le faaseeina le atunuu i ni a matou upu. Na pau lava o lea o le agaga moni e aumai le loto ae avatu ai

le faafetai, a o faafogafoga mai le mamalu o le atunuu o lo o faataunuua ia mea uma, aua o tatou na ona fuafua ma faatupe, a o le faatupega, o le mamalu lava o le atunuu. Se i tanoa foi le auauaga a Matagaluega e fia ma Faalapotopotoga a le tatou Malo. O le mea la lea lafo mai lou faatuatuaga, ia, na ave muamua, peitai ua silasila le Malo, o le 2005 na faaopoopo ai a latou faamanuiaga, toeitiiti lava atoa le 10 tausaga. O lona uiga, ia, o le silasila lena a le tatou Malo aemaise foi se fautuaga a le Matagaluega ma au nei i ia vaega o ni faamanuiaga e toe faaopoopo i le paia o le atunuu aua e le taugofie le latou tautua e ala i le taeao ma le tofa i le afiafi e malolo a ua tele galuega fai. Peitai, o le agaga lena ia te au nei i le faafogafoga mai a Samoa ma le tatou atunuu, ia tatou galulue faatasi, ia tautuana ma outou atinae a le tatou Malo ua i o tatou lauelele, ua i o tatou maota ma tuamaota, ia faia lelei ma tausia ma ia tumau lo latou lelei ona o le tatou putiputi i ai ma le tatou lagolago malosi i le tatou Malo e ala i sui o nuu ma sui tamaitai o le Malo i totonu o afioaga.

Ona pau lena o le vaega, ma le isi itu o le sui usufono mo Siumu, e ui ina le i faamanusinaina sona finagalo ae ua ou fai i ai, aua e te popole i le vai o Saaga i vai foi nei tumaoti, e uma loa Fagaloa ma Niusuatia, ona oo atu loa lea i Saaga le fuafuaga o vai tumaoti e fesoasoani ai le tatou Malo i lo latou faaleleia. O le mea la lea aua e te popole lau Afioga i le sui usufono mamalu, lafo maia lou faatuatuaga, afai e le i faia i lou taimi, o lou faatamala lena.

FOFOGA FETALAI: Malie lau Afioga i le Minisita o lea e tau tulai mai le sui usufono mo Siumu.

Tofa Hon Tuuu Anasii Leota (Siumu): Lau Afioga i le Fofoga Fetalai, e leai o lou tulai atu e fia faamauina lau faafetai i le Afioga i le Minisita. Se o lea ou te viia le Minisita lea, aua o Minisita faapenei e matua lagona ai lota mitamita, aua e ui lava e le o se talosaga tusitusia po o se talosaga na faaleoina, ae sa ou lauga ai i le tausaga ua tuanai. Ma o lea ou te faafetai ai i le Afioga i le Minisita o lo o manatua pea. O lana saunoaga foi lea i le tausaga ua tuanai, toeitiiti lava oo atu i Siumu, a ia alofagia e fia faatinoina ae le i faia le palota. O ou mama na, faafetai.

FOFOGA FETALAI: Malo. Ia tulai mai... Malie lau Afioga i le Minisita se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: Lau Afioga o lea na talosaga atu foi le vai lea i Vaitele lea e faafesagai ma Vailima, le vai o le tatou nuu foi lea i le mataaga, pe a tau ifo ai lou finagalo, ae aua e te faalogo i le taufaavalea a Siumu lea na avatu.

FOFOGA FETALAI: Ia tulai maia lau Afioga i le Minisita e faaaauau le saunoaga.

Tofa Hon TOLOFUAIVALELEI FALEMÖE LEIATAUA: Ia, o faavae lava o le Maota lenei vaeatu le ee o le Fofoga Fetalai ma le paia o le Malo, o le mea e saunoa i ai le sui usufono, o lena le sui usufono mataala, ae le faatoa laga i le taimi o la e ua fai atu ai le tali. O le vai lena, e le afaina e taoto mai pea i le tatou Matagaluega, o lea foi ua silafia e le Palemia. Na pau lava le mea, ia teuteu pea i le taimi lenei, na pau lava le mea o le teuteu, ia aua ne i

tele i ai le lapisi, vaeatu le faafofoga a Samoa ona lelei lava lea, ae le mafai ona tuuina le mea e tatau ona fai i le taimi e tatau ai. I lenei itula, o lena ua avatu le faafetai. Faafetai mo le fausia foi e le Afioga i le Palemia ma le Kabeneta o le faaopoopoina o le tasi o ofisa o le Vaega o lo o i lalo o le Komesina o Sulufaiga, lena o lo o i ai le \$30,000 lena o lo o i le Tala Faatatau Faaopoopo (Nu.1) a le tatou Malo. Ou te momoli atu ai le faafetai, e ui ina e le o i totonu o le Lipoti a le Komiti, atonu o le le taua i le Lipoti a le Komiti, ae o lona uiga o la e lava e lelei le Tulafono, aua e le mafai e le Komiti ona lote le Tulafono.

O le mea la lea e faafetai atu ai mo lea vaega o le talia o se finagalo o le Komesina o Lafoga e ala atu ia te au nei, e momoli atu ai le agaga faafetai. Na pau o lea, ia aoga pea le soifua tautua o nei foi tamalii o lo o taitaia nei Matagaluega, le Komesina o Sulufaiga faapea foi le Ofisa Sili o Pulega o le Matagaluega o Tina ma Tamaitai. Ou te talitonu o se tulaga talafeagai lou taua o le vaega lea, o le aso lea e malaga ai i fafo le tamaitai sa avea ma Pule Sili o le Matagaluega mo le tauaveina o ona tiute fou, le Afioga ia Leituala Kuiniselani Toelupe Tago Elisara. O ia sa tauaveina mai lenei tofi taua, sa ave i ai le faatuatuaga o le Malo e ala atu i le Matagaluega i ona tiute fai ma galuega, o lea ua talia e le Malo lana faamavaega, a o le i maea lona tolu tausaga. Peitai ua silasila mamao leneti tausala o le atunu ina ia saga faalautele lona silafia, aemaise o le lumana i alo ma fanau, o lea ua ia talia ai le tofiga maualuga a le SPC po o le Secretariat of the Pacific Communities i totonu o New Caledonia. O le talitonuga lava, o moomooga foi ia o leneti Maota ia i ai ni alo ma ni fanau a Samoa i tupu ma tamalii e oo atu i ia tulaga e tau ai foi le tatou Malo ma le atunu. Lau Afioga Leituala, ia manuia ou faiva, ia sagai ane ai o le tai ia faamalamalama lou ala ma ia tafetoto foi ma pouliuli lou tino ae toa foi lou loto i le tauaveina o ou tiute fou. Ia e manatu mai i le atunu, o le tofiga lena e te i ai, o le tofiga e tele lona sao i le Pasefika, ia faamuamua pea Samoa i mea uma lava o polokalame fai mo le Pasefika, ia faamuamua lava Samoa i mea uma ma faaiuga e te fautuaina ina ia manuia le tatou atunu. Ia faamanuia le Atua i le lua faigamalaga, manuia le nofo a alo.

Ia le atunu e, o lena ua outou faafofoga mai, na pau lea o vaega sa aafia i sa matou tala, ae ou te momoli atu foi le faafetai i le Palemia ma le Kabeneta ona o le lagolagoina foi o leneti Matagaluega i mataupu e aafia ai faaiuga a le Kabeneta mo le atinae o le atunu. E ui ina matau atu pea i le faaulutautogia po o ulu e toli i le gaoa i finagalo o nisi i le Faigamalo, ae toa pea le tai, e le sese lava le molimau a le Aposetolo o Peretu, “Afaia e au i tatou ma le Atua, o ai se faasagatau mai?” E maua pea le malosi o lau Afioga i le Palemia, e ui foi i mau o lo o fai mai o le le lagona o ni leo, o le foliga lena e pei ua matou toeles ia te oe, ae leai, e tapuai gugu lau Kabeneta, a o ou faiva ia ae ma le malo e tusa o le faafeagai ai ma le tele o luitau ma faafitauli, aemaise o tuuaiga e faapena ona tuuaia ai le tatou Faigamalo. O lo o silasila le Atua. O le molimau lava a le Aposetolo o Paulo, e tolu lava mea na te faamamafa, o le faamoemoe, o le faatuatua ma le alofa. A o le sili o na mea uma, o le alofa. O le faavae lena o lea ou te talitonu o lo o faataunu ai tiute fai o le tatou Malo ma ana faiga faave, o le alofa i le atunu. Ia manuia lau Afioga i le Fofoga Fetalai, manuia foi le Palemia ma le Kabeneta, manuia lena Itu o le Maota, manuia le tapuaiga a Samoa mai ona ao seia oo i ona iu, manuia Ofisa Sili o Pulega ma Pule Sili o Matagaluega ma Faalapotopotoga a le Malo, ia manuia

foi Matagaluega o lo o i lalo o le Minisita o lo o tautala. Ma le faaaloalo, ia manuia le aso.

FOFOGA FETALAI: Malo faafetai saunoa i lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai. Ou te manatu ua malamalamalama le tatou Maota i lau folasaga manino. O lea foi ua e saunoa i le Afioga i le Ofisa Sili o Pulega, ia tatou maea e tasi, ia alofa le Atua e puipui le va faafeagai ai.

Tulai mai lau Afioga i le Minisita mo Fesootaiga ma Faamatalaga Tekonolosi, ua oo i le taimi mo le tatou Matagaluega.

Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi): Faafetai i lau Afioga i le Fofoga Fetalai mo le avanoa. E faafeiloi atu foi i le paia maualuga o le tatou Maota nei, ma e lagona lava e maopoopo pea le paia le pona ma le mamalu autalagata o le Atua Silisiliere i lana taitaiga i le Fono Sili a Samoa pei ona tatou Fono ai i lenei foi taeao fou. Ia taoto ia le mamalu sautuafafafa o le Maota o Samoa ma ona sui usufono, aemaise le taitaiga mamalu a lau Afioga i le Fofoga Fetalai. I le afio o le Afioga i le Palemia, le Kapaneta ma lenei Vaega atoa, ae a foi le paia o le Taitai o le Itu Agai ma lena Itu o le Maota. O lo o mamalu mai foi le tapuaiga a le tatou atunu o lo o tapuai faafogafoga mai. Ae ou te tulai ma le faaaloalo e tali atu i nisi o mataupu sa laga mai e sui usufono mamalu i le felafolafoaiga o lenei Fonotaga.

E le tele ni mataupu sa laga mai, o le a ou taumafai e faamalamalama atu nisi o fuafuaga sa tuuina mai. Sa fesiliglia le oo atu o le SNBH po o le tatou National Broadband pe ua oo atu i le Ofisa o le Faamsinoga. Ma o le tali o lena vaega, ioe ua fesootai uma lava i tatou Matagaluega a le Malo. O le manatu pe mafai ona faatinoina ia faamsinoga i luga o le tatou initaneti agai i fafo, ou te manatu o le tele o lena fesili e mafai ona tali mai i se isi taimi e i latou o lo o i lalo o le Faamsinoga ia po o le Afioga foi i le Minisita ona e tele lava le lavelave i le itu tau Tulafono, ese Tulafono a Samoa o lo o fai ai ana Faamsinoga ese foi a tulafono a isi atunu, ma e tele lava foi le eseesega ia ma le faatinoga e mafai ona faagasolo ai ia vaega.

O le Ofisa o Faamsinoga i Savaii o lo o faagasolo nei ia le taumafai e faafesootai i lalo o le tatou laina lea fesootai po o le Neti fesootai a Samoa. O lenei atinae pei ona faatinoina i le amataga po o le Samoa National Broadband Highway, o le faamoemoe ina ia mafai ona faaopoopo pea i ai ia so o se vaega ma so o se teuteuga ma so o se faaleleiga a o tatou agai atu i le lumanai, o lona uiga o la ua faataoto le avanoa e faaleleiia ai pea ma faatupulaia i le agai atu i le lumanai, po o le a lava le taimi. O lona uiga e faaopoopoina pea ma faaleleiina pea mo le faagasolo atu i luma, ma o le talitonuga foi lena ina ia mafai lava ona faaleleiina pea a tatou fesootaiga faale-Malo e faaaogaina o le tatou vaega lea o auupega lautetele i totolu o Samoa.

O le fesili agai i le faaaogaina o le tatou upega lea mo le falemai. Ia o lena ua saunoa atu le Afioga i le Minisita mo le Soifua Maloloina, ua amata le latou galuega ma e faaaogaina foi le tatou SNBH, o la ua uma ona sainia ia maliega ina ia faatino ai le faamoemoe lea pei ona e faamatalaina e mafai ai ona fesootai atu le tatou Ofisa Tutotonu i Apia nei i isi lala o le falemai i isi vaega, ae o lo o faagasolo le galuega e le faigofie aua e tatau ona aoaoina le

aufaigaluega ia i latou e tali mai ma le ituaiga tali e tali mai ai ina ia manino ma sao ma faigofie ona tuu atu ia ni fautuaga, ina ia aua ne i fesetai ia ni fautuaga e tuuina atu, o lea la o lo o faagaoioi nei.

O lo o ola pea ia le tatou fesootaiga e pei ona i ai nei, i lalo lava ia o le cable i le faapipiina ma fesootaiga o lo o faaaoga ai ia le optic fiber cable o lo o faaaogaina ma o lo o fesoottai e oo mai i le taimi nei. E i ai nai faaletonu o lo o i ai i pou a le Digicel, ma o lo o agai i ai le tatou Matagaluega faatasi ma le Ofisa o Tupe i le faatulagaina lelei o ia faafitauli o lo o aliali i ai i vaega ia.

O le vaega lea e faapea ai i le faaaogaina o le tatou Neti lava i video conferencing, ia e sao o le matafaioi lava lea o lo o mafai ona faagaoioi ma ua leva ona faaaogaina, ae fai sina faigata laitiiti lava i tulaga tau fesootaiga i soifua maloloina, ona e tatau ona matua sao atoatoa se faamatalaga e fai ma le taimi e fai ai, ona e aafia ai le soifua o tagata.

Ona ou oo mai lea i le isi fesili na tuu mai i le itu Asau, faapea e le o manino lelei.....

FOFOGA FETALAI: Malie lava lau Afioga i le Minisita, se i tuu atu lava le avanoa i le Afioga i le sui usufono mo Faleata Sisifo, tulai mai le sui usufono.

Tofa Lealailepule Rimoni Aiafi (Faleata Sisifo): Lau Afioga i le Minisita malie lou finagalo, leaga sa ou laga le mataupu lea i le Broadband talu ai na faapea mai le Minisita se i tali mai pe a faaaaoga. E puupuu lava le fesili lau Afioga o lea ua faaaoga lea vaega taua, po o ai tonu la lea ua fafoeina le managing po o le vaavaaia o lenei vaega, ona o lo o feteenaiga lea faapea ua ave i se Private pe a, ae ou te le o talitonu i ai, ae lelei pe a faamalamalama mai pea e lau Afioga, aua o lea sa i ai le naunautaiga, e faafoe pea e lau Matagaluega ina ia tutusa ma ia laugatutusa le faaaogaina, ia ma fesoasoani foi i le tau ua tuuina atu i le tatou Matagaluega. Ma le faaaloalo lava.

FOFOGA FETALAI: Tulai mai le sui usufono mo Aana Alofi Nu. 3.

Afioga Toeolesulusulu Cedric Pose Salesa Schuster (Aana Alofi Nu. 3): Faafetai i lau Afioga i le Fofoga Fatalai mo le avanoa, faafetai atu foi i le Afioga i le Minisita mo le faamalamalamaina o nisi foi o fautuaga.

Muamua lau Afioga i le Fofoga Fatalai, o le tuualalo ona o lea e matauina pei ona faaalia e le Afioga i le Minisita mo le Soifua Maloloina, ua tolu masina o down le service. O le tatalo la po o le tuualalo i lau Afioga i le Minisita, muamua, po o ua tapena ni training e le gata o i latou managing, a o le training o tagata o le a faaaogaina i Matagaluega taitasi, pei ona i ai foi se atugaluga po o se tuualalo i le Ofisa o le Soifua Maloloina, o le tele o nisi o mai e kili ifo i falemai, atonu e taua tele le vave o fesootaiga lea afai o lea ua tolu masina o down le service lea, ia po o le a se vave e mafai ona i ai ae po o ua lava foi se training o i latou e handle ina, aua ou te talitonu atonu o le isi vaega lea e le o mafai ona faaaoga, atonu e le o lava le aotauina i le faaaogaina e i latou e le gata o tamaitai tausi soifua a o nisi foi o le Pulega.

O le vaega lona lua lau Afioga o le Maintenance, pei ona maua foi i se fesili a se tasi o sui usufono le Maintenance e le gata o servers ma mea.....le hub o lo o i ai, ae i le maintain ina foi lea i totonusi o Matagaluega ma Pulega o i ai, e le gata i lea ia o se vaega foi lea o a trouble shooting a tago atu e i ai se vaega

e le o fetaui, ia i ai se central location e fesili mai ai ona vave maua atu lea o le tali e mafai ona fesoasoani ai, ona o le talosaga ina ia tatou vaavaai pea i ai mo le alualu i luma ina ia mafai ona faafaigofie lea auaunaga, e talitonu ua tele foi se investment a le Matagaluega ae le gata i lea o le tatou Malo, a o se vaega taua tele lenei i le alualu i luma o le faaleleia o auaunaga.

E faaopoopo atu ai lau Afioga i le Minisita, ia po o le a se faataatiaga mo le mafai ona faatinoina e nisi o Matagaluega o auaunaga nei, po o le isi tolu masina ia ua on line ia isi Matagaluega po o ua i ai uma Matagaluega e aoga foi mo le faigofie ona fesootai foi ma fesili ai i nei Matagaluega i le access ina o information.

Ma le vaega mulimuli lau Afioga i le Fofoga Fetalai, o lea ua taua mo le Malo, ae po o mafai foi ona access i ai sui usufono, lau Afioga i le Fofoga Fetalai ona o le tele foi o galuega, atonu o le tasi lea vaega e mafai ai ona fesootai vave ia sui usufono i nisi o Matagaluega, e le gata foi i lea o galuega o manaomia e itumalo, faafetai.

FOFOGA FETALAI: Ia tulai mai lau Afioga i le Minisita.

Afioga Hon TUISUGALETAUA SOFARA AVEAU: Faafetai. Sa tatau ona aumai muamua uma fesili ia i le amataga, ona saili mai ai lea o tali mautinoa, ae o le toe faatopetope mai o ia fesili, ia e le afaina o le a taumafai atu pea, ae o le ala lena o mea, o lea ua leva ona matou faatalitali atu.

Se i faauma atu pea lau folasaga i mataupu sa laga i totonu o le Maota i le vaega lea i le TV ma faasalalauga i le itu Asau. O le lipoti o le monitoring a le Matagaluega i le masina o Novema ma Oketopa, o le masina mulimuli lea sa fai ai le latou saililiga e aofia ai ma Savaii, o lo o maualuga pea le mau a le TV1 i Savaii, aemaise la le itu lea o lo o saunoa i Asau, o lo o maualuga o lo o lelei le.... e i ai taimi e faaletonu ai. O le faamatalaga mai a i latou o lo o lava lo latou malamalamama i ia vaega, e faigofie lava ona lelei ma manino lelei pe a fai se antenna i fafo o le TV1, o lona uiga la e le o se galuega tele e toe faaopoopo i ai ona lelei atili lea o le pueina o faasalalauga a le TV1, o isi TV uma e fa, e le o maua lelei ia faasalalauga i le vaega lea o Savaii.

O lo o fai le galuega ma fesootaiga a le Ofisa o le TV ma le afioaga o Tufutafoe mo le faatuina ma le faaleleia atili o latou faasalalauga i Savaii i le vaega lava lea o le itu o Savaii, o lo o i ai le faamoemoe e faapea le latou faamatalaga e tatau ona maua se suiga lelei i le faaiuga o lenei masina pe a uma a latou feutagaiga ma le afioaga, a o le taimi nei lava ia, o lo o mafai ona faaleleiina pea pe afai e fai nai galuega laiti na i le antenna po o le TV a le tagata lava ia.

FOFOGA FETALAI: Ia se i tulai mai lava le sui usufono mamalu, malie lava lau Afioga i le Minisita.

Afioga Tufuga Gafoaleata Faitua (Vaisigano Nu. 1): E faafetai atu i le Afioga i le Minisita, e sao lelei le saunoaga a le Afioga i le Minisita, ae pau lava le faalavelave e oo loa i le afiafi ua le manino ma se mea, e lelei lava i le aoauli, ae a faapea loa ua pogisa ia ua nenefu ma le reception e faale manino e le manino ai le TV, ae sao lelei le saunoaga a le Afioga i le Minisita, faapea e i ai se isi gaoioiga foi lele e tau, e aua ai le faamoemoe i le la ae fai se mea ia manino ai se i oo foi i le po o lo o manino pea, faafetai.

FOFOGA FETALAI: Ia tulai mai lau Afioga i le Minisita.

Afioga Hon TUISUGALETAUA SOFARA AVEAU: Faafetai. E pei ona ou fai atu o lo o i ai ia feutagaiga o lo o fai nei a le tatou Ofisa o le TV ma le afioaga o Tufutafoe ina ia toe faaleleia atili ia faasalalauga o le TV i nisi taimi ma vaega e le o manino lelei ai pei ona saunoa le sui usufono mamalu.

Sa aumai le faafesili a le sui usufono mo Gagaifomauga Nu. 1 mo le tatou Cable lea e alu atu agai i Savaii, ona e faapea le saunoaga o lo o gata i Manase e le o oo atu i o i isi, ia e sao, o i ina sa gata ai le galuega a le Blue Sky, o le fesiligia o le Blue Sky o le latou faamatalaga, o lo o faagasolo pea a latou galuega faaleleia, e silafia foi e le o pulea tele e lo tatou Malo le Blue Sky po o se isi lava kamupani fai televise ia po o i latou o lo o provide ina le service, ae o le fautuaga, ia e mafai foi ona tatou galulue faatasi, afaí lava o lo o i ai le naunauga a itumalo ia, ia o la ua faafogoa mai le Blue Sky, aua o isi foi ia tagata e mafai ona maua ai la outou pisinisi pe afai e faaoo atu i ai le Cable i nuu ia ma afioaga, e le mafai foi ona matou soona tuleia pe afai e le o gafatia i le taimi nei ma le latou foi business plan ia po o le a le maua mai ai ae o le a e maua e faaalu ai, ae o lena ua fai atu, e mafai foi ona toe fautuaina e sui usufono mamalu ia kamupani lava latou mo le fesoasoani, i lona ia afioaga po o lona itumalo, ae o le a faapena foi ona tuuina atu pea i ai ia fesoasoani a le Malo.

O le faafesili e pei ona tuuina mai i le tatou SNBH po o ai o lo o vaaia? I le taimi nei lava latou o lo o vaaia pea e le tatou Malo, o lo o i lalo o le tatou Komiti Faapitoa ia le vaavaaiga o le Samoa National Broadband, e le o i lalo o se kamupani, o lo o vaaia pea e le tatou Matagaluega ma le tatou Malo. E i ai le Komiti Faapitoa o i latou e toatolu o lo o latou vaaia pea ma faatinoina, ae i ai le kamupani o lo o latou provide ina pea le Technical Oversight. O lona uiga o lo o latou fesoasoani ai i nisi mea e faatino ai le... ae o lo o vaaia e le tatou Malo i le taimi nei, ma e le i faia i ai se faaiuga mulimuli po o ai latou te faia. O lo o i ai pea le manatu pe tuu pea i lalo o le Malo pe faasalalau aloaia ona saili ai lea o se isi e talafeagai po o se kamupani e tuu i ai lea galuega.

O le isi fesili na tuuina mai talu ai nei...

Tofa Lealailepule Rimoni Aiafi: Lau Afioga i le Fofoga Fetalai, malie lava lau Afioga i le Minisita e vave lava ona e taua tele le vaega lea lau Afioga.

FOFOGA FETALAI: Ia, se i tuu atu le avanoa mulimuli i le sui usufono.

Tofa Lealailepule Rimoni Aiafi: O le mea lea o le puipuiga o le tulaga lea i le taimi nei i le faatauvaga, aua a ave i le isi kamupani pei ua disadvantage le isi kamupani. Ia na ona tuu atu pea o le fautuaga i lau Afioga e te tagai i ai, e sili lava le taumafai o le tatou Malo e fai se isi itutino latou te vaaia lelei le vaega lea, ona tauva tutusa mai lea o latou lea e faaaogaina, ae tuu atu i ou tafatafa. Ma le faaaloalo lava.

FOFOGA FETALAI: Malie lau Afioga i le Minisita se i tuu atu le avanoa i le Afioga i le Palemia. Tulai mai lau Afioga i le Palemia.

Susuga Hon Tuilaepa Fatialofa Luplesolai Aiono Sailele Malielegaoi:

Lau Afioga i le Fofoga Fetalai, e matau atu lava i le faagasologa o le atinae o le tatou TV ma electronics, o mea uma lava e alu i luga o mea nei o fesootaiga televavave. O lea lava e alu i luma le soifua. O le faafitauli foi o lo o feagai ma i tatou, e le na o tatou o lea e tupu ai, e tupu foi i fafo aemaise atunuu tetele lea tatou te faapea ua fai si maoae i luma. O le masina o Setema talu ai, na ou manao ai e faaaoga mai le internet e sau ai fesootaiga i le tatou ofisa i inei mai New York, ae logo atu ua ova ma le vaiaso o pepe uma internet i le vaega lea e i ai le tatou ofisa o le Embassy, ua pepe uma lava, a o totonu o le aai aupito sili lea ona tele i le lalolagi, o la e i ai uma lava mea uma. Se i silasila i ai i le tulaga o lea e i ai? O lea lava e agai i luma le soifua. O lea e galo ia te au sa ou faia foi i inei i le Maota nei le o atu... na ou auai i le sauniga o le toeaina lea o Muldoon le Palemia ua tuumalo i Aukilani, sa ma i ai ma Fiame. Ona o atu ai lea o le choir tele lava, o le toatele ia pe ova i le 60 le aufaipese e pesea pese o le tuumalo o Muldoon. Na ona tu mai lava o le faifeau faapea mai, "O le a amata le tatou sauniga" ae pepe uma eletise, pepe lava pe, e uma lelei lava le sauniga e le i toe ola. A o le mea matautia, o le aufaipese lenei na o atu, e faalagolago uma pese i le ta okeni, le ola le ta okeni, le iloa e le aufaipese pepese, uma lelei e leai ma se pese e tasi na usua. Na ota talotalo ai lava ana o se aufaipese Samoa e le moomia na mea.

Sa ou i ai foi i le isi fonotaga tele a atunuu o le Commonwealth, e tu mai le Palemia o le a fai le lauga, ae pepe uma systems. O le mea lea e i ai, o lea e solo i luma le technology ae onosai. Ia manatua foi e le i mamao tele atu na tatou faaaaogaina ai mea foi nei o cable gram, feau faauaealesi, lea e tai alu le fia itula o valaau i le 2AP, sau Simi i le ofisa e avatu lau tupe, sau Sione i i o lea ua maua mai lau fia sefulutala mai Niu Sila. Ua leai ni na mea. Ia ona alu alu lea sau le telex. O le a le mea lea ua i ai? Ua leai se telex ae ua sau le fax. O lea ua sau ma facebook ma isi mea faapena, ua matua sui uma o lea ua mafai ona e tilotilo atu i ata o tagata la e te lua talanoa. O lea e alu i luma le fesuiaiga, ae onosai, e le uma le faiaso. Na ou alu atu foi au i tua i le matou nuu i le matou toonai i le Aso Sa ae complain mai ua tolu vaiaso e le o toe maua le TV1. Ona ou fai lea i ai e faatali mai o le a ou alu e logo le TV1 o i latou ia e nafa ma mea ia, ae onosai o lea e taumafai atu le Matagaluega, leaga o mea ia, e moni lava o mea faaneionapo, ae i ai foi mea faaletonu e le nao tatou o aafia ai, o la e foi e aafia ai atunuu i fafo.

FOFOGA FETALAI: Ia, tulai maia lau Afioga i le Minisita o Fesootaiga e faaiu mai le saunoaga.

Afioga Hon TUISUGALETAUA SOFARA AVEAU: Faafetai mo le faamalamalamaga atili a le Afioga i le Palemia. O lena ua saunoa atu, so o se mea lava e i ai le faafitauli, ma o lo o taumafai atu i ai. O le fautuaga pei ona tuuina mai e le sui usufono mo Faleata Sisifo, faafetai. O le mea lena o lo o agai i ai ina ia tumau pea ona vaavaaia pea e le tatou Malo.

O le fesili agai i se iunite faapitoa latou te tauavea le galuega lea, o lo o alu faatasi le fesili lena ma le fesili i le faiga o le faafoeina o le tatou submarine cable i le taimi nei, pe ono mafai ona tuufaatasi i lalo o le pulega e tasi. Mo le silafia, o le tatou taumafaiga i le tatou submarine cable o lo o faagasolo nei, ua uma ona set up le tatou tino o le poloketi o lo o faagaoioi nei, ma ua tofia i latou faapitoa e toatolu latou te faagaoioiina. O lea la ua galulue nei, e tatau

lava po o se isi lua vaiaso ona faaiuina loa lea o fetuunaiga o lo o fai nei i le mea e oso mai ai le tatou cable po o fea, ae po o fea foi e agai i ai. O fesili taua na e faalagolago i le faatupeina e le faletupe o Asia ma le faletupe o le lalolagi, le world bank.

FOFOGA FETALAI: Ou te vaelupeina le saunoaga a lau Afioga i le Minisita ona o lea ua tatou taunu i le tatou taimi malolo masani o le taeao, ua suia tatou taimi ona o le aso le aso puupuu. O le a vavae foe, tatou alo i le faiga malologa, o le a faaauau le saunoaga pe a tatou taliu mai.

Na faataatia ese Taualumaga a le Fono Aoao mo lana malologa masani o le taeao i le itula e 10:17 ma toe faaauau i le itula e 10:46 i le taeao.

Na toe faaauau felafolafoaiga i luga o le faiatuga faalua o le Tulafono Tau Faaofi o le Faatatauina o Tupe Faaopoopo (Nu.1) 2014/2015.

FOFOGA FETALAI: Faamalo atu le onosai i lenei vaega o le taeao. E manatu ua maea le tatou taumafagati ma ua i ai foi le faasiliga malosi aua le tatou feagai ai ma le tatou Fonotaga mai le taeao.

Ia, lafo atu ia le avanoa i lau Afioga i le Minisita mo Fesootaiga ma Faamatalaga Tekonolosi, tulai mai e faaiuui mai le saunoaga ma le folasaga a lau Afioga ma le Matagaluega. Tulai mai lau Afioga i le Minisita.

Afioga Hon TUISUGALETAUA SOFARA AVEAU: Faafetai o lea ua toe taliu mai le mamalu o le tatou Maota nei mai faiga malologa e pei ona alo atu i ai i le taliga o le sua mama. Ia, e fai le tatou malologa o lo o ou taumafai e tali atu pea nisi o fesili sa tuuina mai. O le isi fesili, po o fai ni aoaoga, ioe, o lo o fai aoaoga a i latou o lo o faafeagai ma lenei polokalame, aemaise foi la o le isi vaega lena o lo o agai atu i ai le Matagaluega o le Soifua Maloloina mo le faataunuina o aoaoga mo i latou e faaaogaina le system lenei, aua pei ona ou fai atu, o le soifua ma le ola o le tagata o lo o faatino i ai le faamoemoe ina ia lelei.

O le isi fesili; po o i ai se central location e coordinate ai le galuega. O le tali, ioe, o galuega uma lava faapenei e tatau ona i ai mea faapena. O la e foi ua sauni le Matagaluega a le Soifua Maloloina latou mo ia vaega latou te taliina ma faatonutonu le faiga o le galuega, aemaise o mea sa e laga e uiga i le maintenance. Ia o vaega lava ia e manaomia i so o se galuega faapenei, e tatau lava ona tapena le fuafuaga ina ia lelei ma sologa lelei le faaauauina pea o le galuega.

Ma le fesili mulimuli lena sa aumai sa ou tali atu foi i ai i le amataga, ioe, o lo o i ai uma lava Matagaluega a le Malo i lalo o le tatou SNBH. O isi la e latou te le i faaaogaina ona e le i tele se manaomia e faaaoga ai, a o la e ua i ai le system, na ona faapipii lava i ai ma oso ai i luga le faaaogaina ona faatino lea.

O lena ua uma ona ou faamatalaina atu si mea laitiiti i le vaega o le submarine cable a tatou, ua galulue nei le aufaigaluega faapitoa ua uma ona tofia mo lea faamoemoe. Ia talosia ia ia vave mai se taimi, ae le laitiiti se

taimi e fai ai lenei galuega. A laititi po o le tasi ma le afa tausaga, o le tele o le galuega e fai i le moana sausau i le sami. E faigofie uta i le eleele, a o tai i le sami, e faigata, ae muliaina foi fai na fuafuaga ae faataatia se alafua e fai ai, ina ia sologa lelei ma taunu mamao le mea... Ia, o nai mataupu la ia sa tuuina mai. O lenei la faamoemoe, o se taimi lata mai ona aumai lea o se faaiuga mulimuli e faatino ai le tosaina o uaea ma mea faapena pe a maea mai le tapenaga o lo o i ai, ma se tino latou te faagaoioia, se kamupani e faatuina ina ia latou tauavea le galuega. Aua po o le a lava, aua tasi lena mea e taumafai ina ia iloilo i ai, ina ia i ai se kamupani po o se vaega po o se Faalapotopotoga latou te pulea le faatinoga ona tau lea i le fesili lea sa aumai muamua po o ai latou te faia le SNBH. O lo o i ai foi la le fesili pe le tuufaatasi loa i lalo o se pulega e tasi le pulega o le SNBH faatasi ai ma le submarine cable, ona o faatasi ai lea o lea galuega.

Na pau ia o nai mataupu, ma e momoli atu ai le faafetai tele i le tatou Fono i lenei aso, aemaise foi o finagalo faaalia i lenei Matagaluega, o lo o sologa lelei lava le galuega. Faafetai le lagolago mai foi i le galuega i so o se Matagaluega o lo o fesoasoani mai. Faafetai atu foi i Ofisa Sili o Pulega ma Pule Sili o Matagaluega ma Faalapotopotoga o lo o tatou faatasi i le latou foi pitolaau, o latou e pau i ai le mamafa o le galuega. Ia faamanuia foi le Atua i le tapuaiga a Samoa, aemaise o si ou itumalo pele o Vaimauga Sasae. Faamanuia le Atua i la outou tapuaiga, manuia foi le Afioga i le Fofoga Fetalai, manuia foi le tatou Fono.

FOFOGA FETALAI: Malo faafetai saunoa i lau Afioga i le Minisita, o le sui lava lea o le Matagaluega aemaise o le Matagaluega o Fesootaiga. Ia, o ou mama na aua le tauaveina o le galuega ma le faatinoga o lo tatou valaaui.

Lau Afioga i le Minisita mo Galuega Tau Alamanuia ma Atinae a le Malo.

Afioga Hon LAUTAFI FIO SELAFI PURCELL (Minisita mo Galuega Tau Alamanuia ma Atinae a le Malo): Faafetai i lau Afioga i le Fofoga Fetalai. Ia, talu ai ona o le aso puupuu le aso lenei, e faapuupuu foi le lauga a le Minisita lenei ma lana tali.

Ae ou te le i amata la ona ou see atu i le taliga o fesili, e tatau pea ona ou faatulou atu i le paia o le Maota, i lau Afioga i le Fofoga Fetalai, le Palemia ma lau Kapaneta, Minisita Lagolago uma, le Afioga i le Taitai o le Itu Agai ma lena Itu, le mammalu ua aofia o Ofisa Sili o Pulega ma Pule Sili o Matagaluega ma Faalapotopotoga a le Malo ua tatou faatasi i lenei aso, le au faasalalau ma le Ofisa o le Fono.

E faatalofa atu foi i le faafogaga a Samoa i ona aotelega mai lava i mauga tetele seja paia mauga iti. E faatalofa aloaia atu i si ou itumalo o Satupaitea, mai lava i Malaeaoga seja paia Falepau. E faatalofa atu foi i ou tama ma tina faaleagaga i Ekalesia uma e fia o lo o i totonu o le tatou itumalo. Faamalo tapuai i lena foi tausaga ua mavae. E pei lava o upu ou te tautala soo ai i tatou faatasiga, a leai la outou tapuaiga, ia e leai se manatu o le sui usufono lenei e fai ai so tatou sao aua upufai o Samoa.

Lau Afioga i le Fofoga Fetalai, e faale tele ni fesili sa tuu mai i au Matagaluega, o isi foi fesili sa tuu mai, ia ua uma ona tali atu i ai isi ou uso a Minisita, pei o fesili na tuu mai e uiga i fanua, fesili na tuu mai e uiga i auala, o lena ua uma ona tali atu i ai isi ou uso a Minisita, e leai la se mea ou te

toe....o le isi foi vaega na tali atu ai le Afioga i le Palemia, ou te le toe paia la tulaga ia.

Ae o le a ou faasolo pea i ai o sui usufono mamalu sa afea au Matagaluega e ono i ni vaega o latou saunoaga po o latou fesili. O le Afioga i le sui usufono mo Faasaleleaga Nu. 2, ese le lelei o le sui usufono lenei e naunau tele lava i mea nei o faamaumauga o fuainumera o faamaumauga, sa ia aiaina foi le mataupu lea o le health survey a le Matagaluega lea o Fuainumera Faamauina a Samoa, ia sa ou tali atu foi i ai, e tai lima lava tausaga ma fai le survey lea, ae faafetai lava i lou faamanatu, a o mea lava ia ua leva lava ona faagasolo galuega a le Malo e i ai vaega ia.

O le sui usufono mo Falelatai ma Samatau, sa taua i lana lauga se vaega e taua tele i le isi au Matagaluega, pei sa taua le faaupuga e uiga i tamaiti foi ia lea ua le toe faatauaina e le Matagaluega o Aoga le o atu e aooga tusa pe leai ni pepa fanau. Ona o au o le Minisita mo Fuainumera Faamauina a Samoa, e tatau pea ona oo atu i ai se leo a o lo o faafofoga mai Samoa. Atonu o lea ua maua e le Matagaluega o Aoga sea faamama avega i matua, le avatu lea o tamaiti i le aoga tusa pe leai ni pepa fanau, o le naunautaiga lava ia a le Matagaluega o Aoga, ina ia aooga tamaiti o le first preference lena, a o a pau mai i le Matagaluega lenei o le Fuainumera Faamauina a Samoa, e taua tele i tagata uma o le atunu ona i ai o latou pepa fanau. O lea la ou te talosaga atu ai i le mamalu o le atunu, a ua maua lea faamama avega aua le tuua ai i i le Ofisa o Aoga, aua e le na o le Ofisa o Aoga e faaaoga i ai le pepa fanau. Na ou auai atu i se fonotaga i Thailand i nai masina o le tausaga na tea nei, o le fonotaga faa-Minisia muamua lea a le Region, Asia Pacific Region, ua amata ai ona faatauaina lava ona i ai ia faamaumauga a atunu uma o mea nei e tau o faamaumauga taua po o vital statistics, pepa fanau, o le aso fanau, o le aso faaipoipo, o le aso maliu, o tulaga faapena po o le a le mafuaaga o le maliu, o tulaga ia o vital statistics ia, ona e aliali mai, le toatele o tagata o le atumotu pei e le amanaia ia tulaga ia. Mo le silafia e le atunu, o le pepa fanau tusa o lau faamaumauga faale-Tulafono lea, o oe o se tagatanuu o le nuu lea, tusa o le legal document lea e iloa ai lou status i totonu o se atunu, e le faapea la na o le aoga e aoga i ai le pepa fanau, e amata loa le pepa fanau i le fanau o le tamaitiiti, e faatoa uma lava le aoga o le pepa fanau pe a maliu, ne i te i la ua faapea, o le na e pei e faale taua mai i le Fono a le Palemene le faiga o na mea o pepa fanau. Ae o lea ou te tau atu, o se tulaga taua tele, e le gata o aoaoga ae i ai i ina le siosiomaga po o le faasinomaga o le tagata lea e i ai le pepa fanau, o le document lena e iloa ai, o ia e i ai lona status i totonu o lona atunu.

Na o nai vaega na ou te fia pai atu i ai leaga o lea sa afea i se faamatalaga a le sui usufono mamalu, te i ua faapea le atunu ailoga e faatauaina nei mea o pepa fanau, atonu o lena ua....ua manaia foi le faiga a le Ofisa o Aoga ia, ae tatau ona i ai se vaega foi lea a ua alu atu le tamaitiiti, ia aoga pea, ae fautuaina matua fai pea pepa fanau a o latou alo ma fanau.

O le sui usufono mo Faleata Sisifo o lea na fesiliglia isi vaega ia, o lena ua tau atu i fanua ia i auala, o lea ua uma ona tali atu i ai isi ou uso a Minisita i Falelauniu. O le mea ua aliali mai pei e le o talanoa ia Matagaluega e lua, ia a o lea ua talanoa Minisita i se auala e mafai ai ona faafoia lena faafitauli. E faapena foi fanua ia na taua faapea e tuu uma i lalo o se body se tasi. Ia ua uma ona tali atu foi le Minisita, o mea uma o le reform lea ua galulue i ai le

Malo. Faamalo atu lava i le sui usufono mo Faleata Sisifo le taulagalaga i na mea ua leva lava ona fuafua e le Malo.

Ona ou oo mai lea i le fesili a le sui usufono e uiga i le faaiuga a le PSC. Ia ai lava o lenei PSC le Matagaluega pei e faasagasaga uma i ai ia faasea a le toatele o tagata. Talu lava ona ou tauavea le portfolio lenei o le PSC, o lo o ou tilotilo pea ma ou mataituna ia faaiuga o lo o fai, ou te talatalanoa foi i le Komisi i a matou fonotaga, e faataua le fai o faaiuga sao, fai o faaiuga e savali i luga o faiga faavae ma le Tulafono o lo o taatia. E le i ai lava la se faaiuga ua ou tau i ai faapea ua sasi ese ai le PSC mai le tuu atu i lalo o le malosiaga o le Tulafono, o lo o savali ai lava le PSC e oo foi i faiga faavae, o lena lava e faapena. Atonu o ni faaiuga e fai i ituaiga Matagaluega ia, e leai lava se faaiuga faapea e fafia uma i ai tagata uma, ona o le faaiuga e aafia ai galuega a tagata, aafia ai le latou tupe maua, aafia ai le latou e mafai ona soifua i se soifuaga foi lea e mafai ona maua mea e manao ai, ae peitai ane, o faaiuga lava o lo o fai i le agai i luma o le tatou atunu, ina ia develop pea le tatou human resource i totolu o Matagaluega a le Malo. I lou lava talitonuga, a manao lo tatou atunu e agai pea i luma, e le mafai ona agai isi vaega ae toso atu i tua le tatou human resource development. O faaiuga foi e fai, e le faia e le Komisi i se agaga foi lea e faatalale le faiga o faaiuga. O lea lava ou te talatalanoa i ai ma o lo o assure mai lava, o lo o fai lava i faiga faavae, o lo o fai i malosiaga According to the Act, ae i ai foi le mea e tatau ona sui, ia o lea ua uma ona ou talatalanoa, a o i ai ni mea i totolu o le Tulafono ua tatau ona sui, sui, aua le fefefe e sui. Ia o lea foi ua aliali mai ia isi tulaga ia sa saunoa i ai le Minisita mo Aoga, Taaloga ma Aganuu, o lea ua saunoa le Afioga i le Palemia, e i ai vaega na ua tatau ona sui, ia e faapena lava, e le faapea e i ai ni Tulafono o le a tamau ai lava e oo i le faavavau. Ae i le gasologa o le progress a le tatou atunu, ia o tulaga na. E i ai lava faaiuga e i ai a latou casualties, e pei o se taua foi lea o se corporation o se nuu, e o lava e tau ina ia maua se mea lelei ae latou te iloa e i ai casualties, we have to expect casualties along the way to development, o le mea lena o lea e tupu i i, o le mea foi lena sa saunoa le sui usufono ACEOs, ia o le mea tonu lava lena o lea ua faa-Konekarate ai, ia tolu lava tausaga tatou toe o i le Drawing Board toe sue, sailiili, e le faapea foi o le tagata lava ua leva ona faigaluega, o le tagata lava lena o le a faigaluega lava e oo mai i le faavavau o faigaluega ai lava i i, e i ai le avanoa e maua atu ai nisi tagata e i ai foi o latou tomai faapitoa e fesoasoani atu i i lea Matagaluega ma lea Matagaluega. Ou te talanoa au ia i le taimi sa ou faigaluega ai i Niu Sila e lua lava terms o le CEO, ou te le o fai atu la a mea o le mea lena e tatau ona tatou alu ai, a o le fuafuaga foi a lea nuu ua lelei developing o latou human resource, ina ia sau lava le avanoa e maua ai ni mafaufauga fou pei se breath of fresh air, new ideas, new talents e aumai i totolu o le Matagaluega. O taimi uma lava la sa ou faigaluega ai e alu ese loa se CEO ua uma lona lua tausaga, ou faapea lea, sole a alu le CEO lea o lea e matua lelei lava, ae sau foi le CEO fou, ia ua matua sili atu foi mea na te mafaiia e ia ma le atinae ma lauolaola le Matagaluega. O tulaga ia e faigata tele le tatou vafealoai ma o tatou tagata, faapea talofa e ia ai, talofa e ua leai se galuega, tatou tilotilo i le aotelega, let's look at the bigger picture here, aua tatou te tilotilo i le laau e tasi ae le iloa atu ai le togavao lea e tatau ona tatou iloa atu i tua, don't see the trees, forest for the trees. E i ai foi lava ia sasi o faaiuga, ia o tagata ola ia e faia faaiuga, e le faapea o ni tagata e leai se sese. Ae pau le talosaga a le Minisita

e uiga lava i le Matagaluega lea, se i tatou ave lo tatou faatuatuaga i faaiuga o lo o fai, i e ua tatou tofia e nonofo e fai faaiuga ia, e le o faigofie le faiga o le latou faaiuga, a o la lava e savavali lava i le Tulafono pei...o le Tulafono foi na pasia atu i le Maota lenei e le o ni Tulafono na fai lava e latou, o Tulafono lava na tatou pasia. Afai lava o i ai ni tulaga foi lea tuga o le Tulafono o lea tatou te silasila atu ma ou tilotilo atu ua solia i faiga faaiuga, ia o i ina tonu lava e faasaga i ai le tatou faasea, ae i lou tilotilo i ai, ia o lo o savavali lava le PSC i ala o mea.

O le a ou see ese la ma le vaega lea.

FOFOGA FETALAI: Malie lau Afioga i le Minisita, se i tuu atu le avanoa i le faauilavea a le sui usufono.

Tofa Lealailepule Rimoni Aiafi: Lau Afioga i le Fofoga Fetalai, ia se i taumafa foi se vai a le Afioga i le Minisita, malo faafetai, ua faamalieina lou sui usufono i lou tali mai ma le....e le faigofie le galuega e moni a au, ae pei lava ona ou talanoa atu ou te talitonu o lena e silafia e lau Afioga le faatupulaia o faitioga i le Matagaluega, i lou la tilotilo, e tatau ona tatou galulue faatasi ina ia minimize le faaitiitia, ma fesili tonu pe aisea ua faatupulaia ai ia faitioga a le Matagaluega? Ia tatou vaai i mea nei positively, faafetai i lou fesoasoani mai i nai atugaluga, e leaga e le o feteneaiga a matou ma le Matagaluega, o feteneaiga lava a le Matagaluega ma isi Matagaluega a le Malo. E manatua foi lau Afioga, o galuega na fai mai e le Komisi o Galuega a le Malo ia empower ma devolve i tua ia Matagaluega uma a le Malo e faatino ai e latou a latou galuega i le tatau ona ia i latou le tomai e fai ai, ae faafetai o lena ua tagai i ai lau Afioga, aua e moni o le Tulafono, a o lena ua e saunoa afai ua excessive le faaaogaina o le Tulafono e disadvantage ai nisi tagata, ia o lena ua i ou aao lea vaega, ae faamalo faafetai.

FOFOGA FETALAI: Ia tulai maia lau Afioga i le Minisita e faaaauau mai le saunoaga.

Afioga Hon LAUTAFI FIO SELAFI PURCELL: Ia faafetai le fesoasoani mai i le sui usufono mamalu, o le tulaga lena, e leai lava se Matagaluega o faapea o galulue agai i tua Samoa, e leai e tatou te naunau lava ina ia galulue faatasi uma, ma ia faafaigofie uma ia galuega, ae pei o i i le PSC pei o i ina lea e taulai uma i ai Matagaluega nei, ae taatia mai lo outou faatuatuaga o lea lava o le taumafai lava i le mea e gata ai foi le mafai ina ia fesoasoani i le tatou Matagaluega aua lava le atinae o tagata faigaluega a lo tatou Malo.

O se tasi o sui usufono mamalu mo Salega, Afioga Afualo Wood Uti Salele sa ia fesiligia le faletalimalo lea o le SLC. Mo le silafia e le sui usufono mamalu, ia ua leva foi ona oo i ai ia talatalanoaga a le Matagaluega nei, e leai se manatu faapea e fai ni faletalimalo a lo tatou Malo e tauva ma tatou Private Sector, tasi foi ia anavatau a le Malo e develop le tatou Private Sector o i latou na i ai le tomai faapitoa e galue ai ia tulaga faapea o faletalimalo, o le anavatau a le SLC o lo o vaaia eleele, ina ia invest i eleele a lo tatou Malo. O le fuafuaga foi la na fai isi ou uso a Minisita sa i ai i lena taimi e fai le faletalimalo, ia o se fuafuaga manaia tele, ae e le i i ai se manatu faapea e fai ona o lea o Matagaluega a le Malo e run le mea lea, leai, o lea lava e

faasolosolo faapena le.....e i ai le manatu, e uma loa ona faamatuu atu lea i tua mo se taimi o i luma. Ae faafetai mo le faamanatu mai.

O le tulaga ia i Statistics ia sa taua foi e le uso a Minisita mo Faatoaga, Faleoloa o Faatoaga ma Faigafaiva, ia atonu sa le tatau ona tupu lea mea – ma o lea foi ua uma ona faatonu le Matagaluega o Fuainumera Faamauina e aua ne i toe tupu lena mea. Le Minisita ia o le o o latou e fai, o le Agriculture e fai ona lua lea o Matagaluega e o faapea. Aua a o atu nei le Agriculture ae vaiaso lea o atu le isi vaega, e lua lava tali e ave i ai, o au e i ai lau papovi, aua e o atu nei e ese le numera o povи, e oo atu i le vaiaso lea ua fananau isi povи ua faaopoopo, a leai ua fasi isi povи ua toesе, ae tasi lava le Matagaluega e fai, ia atonu o la ua talatalanoa ia Ofisa Sili o Matagaluega, ailoga a toe tupu lea tulaga, ae mo le Matagaluega o Faamaumauina, e le toe o latou e faitau ni povи. O le susuga ia Papaliitele Niko, sa na lagaina le mataupu tau i le suspension o CEOs ma ACEOs ae totogi pea, atonu o le fesili foi lea a si au Minisita lagolago aua o le Afioga ia Papaliitele mo le silafia o lea ua avea ma au Minisita lagolago, ma ou te faalagolago tele foi i ai. O lea ua na laga faalua le mataupu lea, atonu o lea foi lava e fai nei faiga uma i lalo lava o le Tulafono, aua e pei o tagata e breach le code of conduct, lea lava e i ai le division o le Tulafono e leave with pay, ao le vaega lea e molia i ni solitulafono i lalo o le crimes ordinance ma le Police Act, o vaega la na e leave without pay, e le faapea o tagata uma lava ia e suspend e leave with pay. Ae taatia maia lou manatu si au Minisita lagolago, o le mea sili o lea ua e sau ta te faifaimea faatasi, tatou talatalanoa po o le a le mea e tatau ona fai i le mea lea.....

Susuga Hon Tuilaepa Fatialofa Luplesoliai Aiono Neioti Sailele Malielegaoi: Lau Afioga i le Fofoga Fatalai.

FOFOGA FETALAI: Malie lau Afioga i le Minisita sei tuu atu le avanoa i le Afioga i le Palemia.

Susuga Hon Tuilaepa Fatialofa Luplesoliai Aiono Neioti Sailele Malielegaoi: E manaia lava le lua talatalanoa i le lua mataupu ona avane lea i totonu o le Kapaneta, e le tau talia fua i i, e le faalauaitelea lena mea. O le mea lea na ou fafia ai e tofi le Minisita lea ii, ina ua tofi i o i le Komiti o le Tupe, aua ana le tofia nei i le Komiti o Tupe e le maua mafauauga lelei ia. O lea la ua avanoa ai ma ua tele mai ai mafauauga lelei ia, ae e lei i ai muamua i le taimi sa matou mafuta ai, ae fai a lua mea ona avane ai lea i totonu i le Kapaneta.

FOFOGA FETALAI: Tulai maia lau Afioga i le Minisita e faaauau le saunoaga.

Afioga Hon LAUTAFI FIO SELAFI PURCELL: Ia toeitiiti lava oo i ai lau faamatalaga, ae ta talanoa ona ave ai lea o se ta pepa i le Kapaneta. Pau lava si tala lea e.....aua e puupuu lava

Afioga Hon Palusalue Faapo II: Lau Afioga i le Fofoga Fatalai.

FOFOGA FETALAI: Palusalue o lea e tuli le tatou taimi. Tuu ia le felefele o le vaosa o lea e.....e leai se tatou mea e maua ai e uma ae foi na o..... Tulai mai lau Afioga i le Minisita e saunoa.

Susuga Papaliitele Niko Lee Hang: Ona o lea e taua au. Lau Afioga e tulai atu e fai se tala puupuu i le tulaga lea ua saunoa i ai le Afioga i le Palemia aemaise foi o le Afioga i le Minisita o lo o ma galulue faatasi. E moni lava au e sao o Minisita ma ua ou lagalaga nei le mataupu lenei, ona o lea ua tulai mai tulaga ia. O le mea muamua lava o le confirm ia te au o le totogi lea o se tagata faigaluega e ova ma le tausaga, maea lea o se sailiiliga e faamaonia e sao tuuaiga ao lea ua alu le tupe e tusa o le \$200afe e le toe maua mai, ao lea e fetuunai, a faamalolo le tumau, taofi faamanuiaga ia aua e mautinoa lava a toe tulai mai e faamaonia e le faamaonia ia tuuaiga, ia e toe maua uma lava faamanuiaga. E pei o le tulaga lea lau Afioga.

FOFOGA FETALAI: O lea ua maua tonu lava le auga o lou finagalo. O lea foi o le a oulua talatalanoa ona ave lea o le lua pepa i le Kabeneta. Tulai maia lau Afioga i le Minisita.

Afioga Hon LAUTAFI FIO SELAFI PURCELL: A fai a ta talanoaga Papaliitele ona faaali tonu mai lava lea o au mea na e ave ai le ta pepa i le Kabeneta. Lau Afioga i le Fofoga Fatalai ona pau lea ua faauma i i le tali o au fesili ia ae a i ai nisi fesili o atu i lou ofisa ta talanoa ai. Manuia tele le Fonotaga i lenei aso. Soifua ma ia manuia.

FOFOGA FETALAI: Short and sweet. Ua tatou taunu mai i le toe Ulutaia o le tatou Kabeneta.

Tulai mai lau Afioga i le Minisita o Tupe Maua, ua avanoa le tatou Maota i le saunoaga a lau Afioga ma le Matagaluega.

Tofa Hon TUILOMA LAMEKO: E lagona lava le loto faafetai i le Atua, aua ua aulia manuia lenei aso, ua tatou faalogologo foi i le tele o saunoag a sui mamalu aemaise Minisita o le Kabeneta. O lau vaai atu la i tulaga ia, e leai nisi sa faaalia ni o latou manatu e faatatau i le faagaioiga o mataupu a le Matagaluega lenei o Tupe Maua, e pau lava le mea lea na ou tau maua atu i le tele o nisi taimi, o lo o faafetai le tele o nisi sui usufono i le Matagaluega lenei o Tupe Maua a le tatou Malo. I le tala o tupe maua nei, o lo o faaalia ai le tulaga lelei o lo o gaoioi i ai le Matagaluega. O lo o taua foi i le tala o le Tupe e le gata o le tupe i le Tala Autu, ao le tala foi faaopoopo, o lo o faalagolago lava le faagaioiga o le tatou Tala o le Tupe, i ni tupe e maua mai i gaoioiga a le Matagaluega lenei o Tupe Maua. Lau Afioga i le Fofoga Fatalai faapea foi lau Afioga i le Palemia ma le mamalu o le Fono Aoao Faitulafono.

E tele lava ni gaioiga o lo o fai i le Matagaluega lenei, ua ou taua le tele o gaioiga, aua o a lava a tatou fuafuaga uma e fai, e tatau lava ona mautinoa lelei ma o lau tala foi lea i le Ofisa Sili ma le aufaigaluega a le Tupe Maua, ua avatu le faatuatuaga i ai o lo tatou Malo, ina ia taumafai i le mafai e gafatia ona ao uma tupe e tatau ona maua e le tatou Malo, aua a lelei ona ao tupe a le Malo e le Matagaluega lenei, e le toe i ai se fuafuaga a le Malo e sii ai ni tiute o ni oloa e auina mai i totolu o le tatou atunu. Lau Afioga e pei ona ou taua e leai se mea na fesiliglia ai le Matagaluega, ao lea ua ou tauina atu, ni vaega taua o lo o i ai nei aemaise le Mataluega, tulaga o le sailia o ni tupe e faagaoioi ai ni a tatou Tala o le Tupe mo le faagaoioiga o galuega a le tatou Malo. Lau Afioga i le Fofoga Fetalai, e pei ona taua e leai ni fesili na faia agai i le Matagaluega, o lona uiga o lo o gaoioi lava le Matagaluega i le mea e gata ai, ae e i ai foi lava taimi e.....aua e le faapea o le a selau pasene i taimi uma, e i ai lava taimi e le lelei ai. Ao le tulaga lea ua ou tauina atu i lau Afioga, o se tasi lenei o galuega o lo o fai, ua valaau foi i nisi o lo o i ai lo latou tomai faapitoa i mea nei o tiute ma le custom ina ia aumai ni a latou fautuaga, ina ia mautinoa lava, aua e le o se galuega faigofie ia le tulaga o le faia o tiute, e fai i luga o le tulaga iloa atoa ma le faamaoni. Lau Afioga i le Fofoga Fetalai, avea lenei avanoa taua ou te faafetai atu ai i le tamaitai Ofisa Sili faapea foi le aufaigaluega o le Tiute, ona o galuega sa feagai ai ma le faamoemoe, o le a gaoioi pea i le malosi e mafai. Ia iloa lelei e e o lo o faigaluega ai, o le faamoemoega lea o lo o i ai nei le Tala o le Tupe a lo tatou Malo mai i lea taimi i lea taimi, ia mafai ona maua uma tupe e tatau ona aoina i totolu o le Matagaluega o Tupe Maua. Lau Afioga i le Fofoga Fetalai o se manatu lea e fia faaalia e pei ona ou taua e lei tele ni mea na lauga mai ai e aafia ai le Matagaluega nei. Avea foi lenei avanoa ou te faafetai atu ai i le paia maualuga o lo matou itumalo i Falealili. Le Alalagafa ma a la nofo ma Tauagaeseese ia Falealili, faafetai i le tapuaiga a le tatou itumalo, ao faagaoioi galuega i totolu o lo tatou Malo. O le isi lea itumalo e matua gaoioi tele i le tulaga....aemaise lava i mea tau atinae, atinae o Faatoaga ma isi atinae, ia faaauau lo outou malosi e faagaoioi ai ia galuega o atinae o lo o lagolago malosi e le tatou Malo o lo o faatuina i totolu o le tatou itumalo. Manuia tele lau Afioga i le Fofoga Fetalai, le Palemia ma le mamalu o le Kapeneta. Soifua ma ia manuia.

FOFOGA FETALAI: Faafetai saunoa i lau Afioga i le Minisita o Tupe Maua, faapea foi le faafetai i le tatou Matagaluega ma ana galuega faatino. Tulai maia lau Afioga i le Minisita o Faamasinoga Fanua ma Suafa.

Afioga Hon FIAME NAOMI MATAAFA: Lau Afioga i le Fofoga Fetalai, faapea sui usufono mamalu o le Fono Faitulafono, tatou auai faatasi foi ma alalatai le vaega o Ofisa Sili o Matagaluega ma Faalapotopotoga o lo o pau i ai le faatinoga o le tele o le galuega ma le auaunaga a le Malo, ae o lo o faapea foi ona tapuai mai faafogafoga le mamalu o le atunu i ona tulaga

faalupe, ae o lenei itula ou te tulai atu ma le faaaloalo, e tautalagia foi i le tatou mataupu o lo o i le Laulau a Fono. Lau Afioga i le Fofoga Fetalai e muamua ona momoli atu le faafetai i le Komiti mo lenei Tala o le Tupe Faaoopoopo (Nu 1) 2014/2015, aemaise foi le fautuaina o tupe o lo o faaagaaga mo lenei Matagaluega. Faafetai tele ma ua faamauina foi le fautuaga mai le tatou Komiti, aua lava le faaleleia o le auauanaga a le Matagaluega. O le fautuaga o lo o aumai ina ia faaaogaina le malosi o le la e fesoasoani ai mo le eletise a le Matagaluega, sa i ai se isi kamupani sa amata ona faaaogaina luga o le matou fale, ia ae sei tulituliloa lena faamoemoe e fesoasoani ai, aua e tele lava le pili o le eletise, ma atonu o lea foi tulaga e le na o le Matagaluega lenei o lo o feagai ma le tau o le eletise mai i ana tupe e faaalu i lea tausaga i lea tausaga. Lau Afioga i le Fofoga Fetalai o nai faamaumauga lava o le tatou mataupu lenei, i le faapapalagiina o le vaega o le lipoti a le matou Matagaluega, faamolemole sei silasila ane ia le Failautusi, ai o se misprint, lena o lo o tusi ai le Matagaluega o le MNRE i totonu o le tino o le fautuaga o lo o aumai. Ona ou oo mai ai lea i mataupu sa laga lau Afioga, e le toatele ni sui usufono sa.... vagana nisi o mataupu i Matagaluega o lo o tauavea, e lilifa lava i talosaga ma fautuaga aemaise lava mo le motu i Salafai mo le faaleleia o le auauanaga i Savaii. Ma ou te faapea atu ma lou faaaloalo ua faamauina ia talosaga ma fautuaga lelei ua tuuina mai. E tasi le fesili tuusao e uiga lea i le siitia o nisi o auauanaga i totonu o le Matagaluega, e pei o vaega ia ua maitauina le sii o lea auauanaga, o le vaega lea mo pepa saofai ma talosaga e faaulu i le vaega lea o le Faamasinoga o Fanua ma Suafa, sa \$60 o lea ua sii i le \$100. Lau Afioga i le Fofoga Fetalai ma le mamalu o le Palemene, o le fua lava lea o le tau o le faatinoga o le auauanaga, aua pei foi ona silafia e le Maota, e faalua ona faasalalau uma tatou vaega ia o le faiga o saofai, faapea foi ma a tatou talosaga.

I le faafesili lautele i le siitia o auauanaga eseese e le gata i lau Matagaluega a o totonu o isi Matagaluega a le Malo, lau Afioga, atonu o lea sa tali atu i ai le Afioga i le Palemia.

Ia, lau Afioga atonu foi o lea sa taua foi i le saunoaga a le Palemia, tau ina ou faapupula atili se tasi o auauanaga ua siitia i totonu o le Matagaluega lenei i le Faamasinoga o Fanua ma Suafa, o lea ua mafai ona pueina uma faila ma faamaumauga i inei i Upolu, e 25,000 faila ma teuina i totonu o computers, ma o lea ua amataina nei ona mafai ona faaaogaina ia vaega. Ma o le itu taua o lenei auauanaga fou, muamua, o le puipuia o nisi o a tatou faamaumauga tuai, semeamanu lava a tuai ona faasaoina mai, ma ua avea lea poloketi i le faaleleia o faamaumauga ua mafai ona faasaoina mai ai tatou old records ia. E le gata foi i lea, o le faaleleia lava o tulaga tau faamaumauga aua e tua i ai le galuega a le Faamasinoga. Ma le lona tolu, o le teuina faa-computer ua faafaigofie ai le maua vave mai o pepa i le autovaa atu foi o le atunuu, easy retrieval o records and papers i totonu o le Matagaluega. Ua maea la Upolu, ma o lea ua mafai ona faagaoioi ai le tatou faiga fou lea, a o le a amata nei ia Savaii. Ua uma ona tapena aua o le galuega lenei, e tapena muamua faila, a lelei loa le tapenaga ma faalelei, ona pueina loa lea. O Savaii la, ua uma ona tapena pepa, ma o lea ua faagasolo le pueina o ata, e 20,000 faila mo Savaii.

O lea foi sa tautalagia i nisi a tatou Fono ua uma atu le faamauina lea o faamaumauga i le pueina o leo i totolu o Fale Faamasino, ma ou te fiafia lava e faasilasila atu, o lea ua faapipii uma ia tulaga i totolu o tatou Fale Faamasino e 12 i totolu o le tatou Fale Faamasino lea, ma faapea foi ona faasolo atu i tatou Fale Faamasino i Savaii.

Lau Afioga, o se tautalaga puupuu lea ma le faaaloalo, ia manuia lava toe taimi o lenei Fono. Soifua.

FOFOGA FETALAI: Malo faafetai i le saunoaga a lau Afioga i le Tamaitai Minisita mo Faamasinoga ma Pulega Tau Faamasinoga, aemaise o nisi o Matagaluega o lo o i lalo o lau Puleaga. Malo faafetai.

Tulai maia lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanua ma Leipa): E momoli atu le faafetai i lau Afioga i le Fofoga Fatalai, faamalo le faapalepale i lenei foi aso. E manatu o le faamanu i le Atua e le faaitiitia aua o lea ua tatou fesagisagiai foi i lenei tausaga fou i lagitotoa po o lagi manino, ae le o gasolosolo o ao po o ni ao taalolo.

Ia eetai pea ia lau Afioga i le Fofoga Fatalai ma le paia maualuga o lenei Maota i le afio o le Afioga i le Palemia ma lea Itu o le Malu, faapea foi le afio o le Afioga i le Taitai o le Itu Agai ma le latou foi Vaega i le la Itu o le Maota.

Tulouna ia ou paia masani Samoa aua e le o ni paia e toe tau faaolioli pe o ni paia e toe tautofi, e leai, o paia masani aua o Samoa e talatofi, a o toga e talatau. Ae nuunuu atu ia ou paia ma ou mamalu i e o i faleupolu, o si a latou matafaioi tauave lena, a o lenei ituaso i le paia ma le mamalu o sui usufono filifilia o le Fonousu a le atunuua aofia ma potopoto nei. Ou te talitonu e le o ni pa ua fesopoai, e leai, o le tofa ma le faautautaga tatala ona o le sailiga o Malo ma le talutalufou o le faamoemoe mamao, aua le fuaga o lalovaoa ma le lumanaia ma le taeao aena o afioaga ma alaalafaga e faapea foi le aoao o Samoa. Ae talosia ia le tatou savaliga i lenei tausaga fou, ia mamao le maatui, le maatala ma le maagao, ia i ai manu ma manuia atili ia osofia pea moegaluaga i lena Itu o le Maota, ia faapea foi i lea Itu o le Malu, ia oa ma tamaoaiga.

Lau Afioga i le Fofoga Fatalai, e le o pogisa pe punitia le silasila mamao a le tatou kamupani vaalele le Polenia i fuafuaga mamao mo le agai i luma aua o faiga masani lava ia a so o se kamupani po o so o se pisinisi, e silasila i so o se auala ina ia faatupu ma ola atili aua o le sini autu ina ia ausia ni tupe faasili se tele.

Ua tuanai atu nai tausaga po o le fa i le lima o ausia pea lea faamoemoe e le tatou kamupani, e le o tapunia se faitotoa, o lo o silasila foi i faamalama uma e maua ai avanoa, windows of opportunities mo le agai i luma ma le faalautele o le auauanga po o le tautua. O tulaga la ia e le o faapea o nofoai le tatou kamupani ma le Malo, o lo o sailili pea ma faia pea faatalatalanoaga i le tulaga o le faatino o le tautua lea aua se manuia o le tatou atunuua, aua tasi lea tulaga o lo o faamoemoe i ai le tatou tamaoaiga, o tagata faimalaga mai i le atunuua po o tagata tafafao maimoa mai fao.

O le naunautaiga lena o le tatou Malo o lo o i ai ma le tele o isi atinae o lo o faatino faatasi, o le auga lena ma le faamoemoe, ia tupu ma ola le tatou

tamaoaiga aua se manuia o tagata lautele. O lo o silasila pea i le tulaga o le agai atu i nisi atunuu po o le faalautele o le tautua pei ona ou taua. O na faiga uma e fuafua i tulaga o maketi, e fuafua i le aofai o tagata femalagaaai, fuafua i tulafono o lo o faapena ona fai ma taiala i ituaiga pisinisi faapenei. E le o i ai lava la se mea o taofia, o lo o silasila pea i avanoa uma e ono maua, lea foi pei ona molimauina i le tausaga ua mavae atu se tasi o vaalele fou a le tatou kamupani i le va lava lea ma Amerika Samoa ina ia faatupulaia pea le tautua lea aua o tatou tagata. E le gata i lena, ae faapea foi isi atunuu o le lalolagi. A ua saunoa le Afioga i le Palemia i nisi tulaga o le kamupani vaalele, le tatou Virgin Samoa ma le faiga paaga lena. E le faapea foi la o nofonofo le Malo i le tulaga lea, o la e foi e silasila i nisi avanoa aua o le tele o vaalele e afea lo tatou atunuu, o le faatuputupulaia foi lena o le tatou tamaoaiga, aemaise o le tele o galuega pei ona saunoa le Afioga i le Palemia, o galuega o mea taua ia mo tatou tagata aemaise alo ma fanau ua faaiu mai i aoga.

E sao le saunoaga i le tulaga o pasese, le faasea i le tulaga lea o le talatalanoa o ni kamupani vaalele, aemaise la pe a faapea o se tulaga lea o le lua o ni kamupani vaalele ona fai tonu lea o le tau o pasese i le tulaga e faavasega ai ina ia tumau ai ma maua tupe faasili. A o le itu e le lelei ai le faiga lena, aua o le a mafatia ai tagata lautele, tagata feoai. O tulaga masani lava e tupu i kamupani vaalele, e tupu foi i so o se kamupani i totolu o maketi o lo o faapena ona latou galulue ai. O lona uiga o faiga lava ia pei e talatalanoa, ma o le mea la e tupu mai, ina ia taofia ai se faiga faatauva. E pei ona manatua ma silafia, tasi lea anavatau a le tatou Malo, ia faatuputupulaia i totolu lava o le lio o le aufaipisinisi, ia faatupulaia ma faateleina faiga faatauva aua o faiga faatauva e manuia ai le atunuu, e pau ai i lalo le tau, afai o oloa, o oloa. Afai o ituaiga auauanga eseese, o le tulaga lava lena. E manuia ai la le tagata lautele i nisi foi faamanuiaga e tafe mai i le faiga lena o le faatauva.

O faiga la ia pei ona saunoa i ai se tasi o sui usufono, e pei e taofia ai le tulaga lea. O le fesili la; o le a le fofo o lea faafitauli? O le tele lava o atunuu o le lalolagi, e i ai tulafono e aiaia ai le tulaga lea. O tatou la, o lea ua maea ona tapena le tatou Tulafono, atonu o lea ua faafofoga mai le susuga i le Loia Sili faapea foi le Matagaluega o Pisini, Alamanuia ma Leipa, ua tatau ona faao mai i le tatou Maota Fono, po o le tauaofiaga i le masina fou po o le masina o Mati le Tulafono fou lea e aiaia ai tulaga faapea. E le na o le pau lea o le faiga, e tele isi mau faiga e fai e le aufaipisinisi ia taofiofia ai le tulaga lea faatauvaga a ia tele ai pea le latou tupe faasili e maua, ae safai ai tagata lautele po o consumers. O le tulaga la lena ma fuafuaga mo le agai atu i luma i ni nai masina o lo o lumanai nei.

O le masina o Tesema lea na se i mavae atu nei, sa afea lou ofisa i se savali mai ni tamalii faipisinisi o le atunuu, le vaega lea a le private sector, sa talatalanoa mai o lo o faatino latou feutanaiga ma se kamupani vaalele mai le atunuu o Saina. O la e taumafai latou i se vaalele e lele mai le atunuu o Saina i Samoa ma faapena ona taamilo atu i Niu Sila ma Ausetalia. Ia atonu talosia lo latou faamoemoe ia tau lau o le latou faamoemoe ma taunu lena taumafaiga. Aua pei lava ona tatou malamalamai i ai, o le tele foi o vaalele, o le tauvaga foi lena ma pau foi i lalo le tau o pasese. O le taumafaiga la lena ua leva ona taumafai mai, ma pei ona fai atu o lo o i ai nai vaega e noatia ai ma tau faafaigata ai isi tulaga, ae le o taofia ai le faatalatalanoaina o vaega ma avanoa uma faapena.

O le tau o le moa lea na saunoa i ai se tasi o sui usufono faapea ua \$95 i le tau o le pusamo, e sao le saunoaga lea ma le faaaliga lea. O le mea lea e tupu, e lua ituaiga moa. O le moa lea taugofie lea sa \$64 i le \$65 i le pusa, o le moa lena sa aumai Amerika, o le moa taugofie lena. O le mea la lea na tupu nei, fai mai le tala o lo o i ai nai mataupu na feeseseseai ai tulaga o aufaigaluega ma kamupani nei e saunia moa nei mai Amerika. O lo o i ai a latou foi feeseseseaiga i tulaga tau galuega. Ma o le mea la ua tupu, ua faaletonu le sapalai i le aoina mai o le moa taugofie lena mai Amerika. O lea la ua liliu le tatou aufaipisinisi e saili le tulaga o moa aua le fofoga taumafa o le tatou atunu, o lea la e maua i Niu Sila. O le moa la lea mai Niu Sila pei e tau fai si taugata ina ia taunu mai i totonu o le tatou atunu. Ae talosia masalo e le o toe umi ona maea lea o feeseseseaiga o lo o feagai ma Amerika i kamupani moa ona toe maua lea o ni a tatou moa taugofie aua foi le fofoga taumafa o le atunu. O le tulaga lena pei ona i ai, o tatou oloa faatauina atu i fafo, o lo o galulue soosootauau pea le tatou Matagaluega ma le private sector, o lea ua maea foi ona saunoa le Minisita mo Faatoaga i le talo. Ia manatua foi e i ai nisi faipisinisi o lo o latou faatauina atu foi le talo i fafo. O le 12 masina na tuanai atu, o lea sa avatu le aofaiga o containers, a o le 12 masina ua tuanai i le 2014 i le tulaga o galuega ia soosootauau ai ma le Matagaluega o Faatoaga faapea foi le vaega lea o exporters, ua siitia ai le talo lea e auina atu i fafo, ua \$4 miliona le tupe faapea na mauaina i le tatou talo i le tausaga na mavae atu nei, faatusatusa i le 2012/2013 pe \$1.7 miliona. O lona uiga ua tele lava le sii lea ua sii ai i luga le tulaga o le aofai po o le tulaga o le talo e faatauina atu i fafo, ma ua sii foi i luga le tulaga o seleni e maua mai ai, faapena ma isi oloa uma a Samoa lea sa ave i le faaaliga oloa lea sa fai i Niu Sila. Ua matauina ua sii atoa i luga oloa nei sa faaali ma faalauiloa e Niu Sila, ua ausia le 100% o oloa e taulia atu i fafo.

Lau Afioga i le Fofoga Fetalai, a o le i faamauina le tootoo o lenei sui usufono, ou te fia afea lou itumalo ma le latou tapuaiga, ae ou te talitonu o le a taoto ia ma fata i ao ma ee i lagi o outou paia lo tatou itumalo o le a ou le toe tautala i ai aua o paia masani e le toe avea. Ae momoli atu le faamalo ma le faafetai i la outou tapuaiga, faafetai tatalo, faafetai le manatu mai foi, ia talosia faiva o lo outou sui usufono, ia faapena ona faamanuia le Atua ia te outou ma lenei tausaga fou.

Ae le i maea se upu lau Afioga i le Fofoga Fetalai, na ona avatu o se upu faamaise i le faletua ma le nofo a alo faapea foi le Ekalesia i le afioaga o Leusoalii i lou itumalo ona o le valaau paia a le Atua i le susuga i le Faifeau Toeaina, ia faapena ona faamafanafana pea le agaga o le Atua i le faletua, le nofo a alo ma le tatou Ekalesia faapea foi le afioaga, ia maua se nofoaga tumau i le oliolisaga e faavavau o lo tatou Tama faaleagaga.

Ia, lau Afioga i le Fofoga Fetalai, ia manuia ma ia folau i lagima le tapuaiga a Samoa faapea foi le tatou Maota nei i sui usufono mamalu uma, faamanuia foi le Atua i Ofisa Sili o Pulega ma Pule Sili o Matagaluega ma Faalapotopotoga a le Malo o lo o faapena ona lagolagosua aua le Fonousu a le atunu. Ia manuia ma ia soifua.

FOFOGA FETALAI: Malo faafetai saunoa i lau Afioga i le Minisita mo Pisini, Alamanuia ma Leipa. Lau Afioga i le Palemia, tulai maia e faaiu mai le saunoaga a le Kapaneta ma le tatou Malo.

Susuga Hon TUILAEPA FATIALOFA LUPESOLIAI AIONO NEIOTI

SAILELE MALIELEGAOI: Lau Afioga i le Fofoga Fetalai ma le mamalu o le Maota, o lea ua sau ia te au le afi. O le faamalo e le tatau ona tuua i lalo le faafetai i Afioga i Minisita ma a latou tapenaga ua mafai ai ona tali manino atu i le tele o mataupu sa fia malamalama ai le tatou Maota nei. O tulaga foi i nisi mataupu e aafia ai au, ua uma lava ona ou taumafai e faamalamalama atu a o faagasolo le tatou felafolafoaiga se i vagana lava si mataupu laitiiti lea ua uma ona saunoa manino i ai le Sui Palemia, o le tulaga lea i le tatou malae vaalele ma le tulaga i femalagaaiga i vaalele, o lea ua tali manino atu i le mea lava lea o le taua o le faatauva e alu ifo ai i lalo tau o mea o lelei atili ai le tautua. O le faataitaiga aupito sili ona lata mai, e manatua ai pea e tatou le taua o lea faiga, o tauvaga nei e fai nei a le Digicel ma le Blue Sky, muamua atu, o le matua leaga lava o tatou telefoni sa i ai, ma le tautua. O le tulaga la i fuafuaga ua faataotooto pei ona saunoa i ai le Sui Palemia, o mea uma ia ua faamalumalu mai i luga o tatou, ua talafeagai lelei lava ma le fuafuaga e amata loa ona siitia le tulaga e i ai le tatou malae vaalele ma fale faaee pasese ina ia siitia mai le tulaga o i ai nei i le Five Stars. A pipii loa le Five Stars i le airport, o lona uiga ua silisili atu le tatou malae vaalele nai lo isi lava malae vaalele o le tatou foi itulagi i atumotu. E pau lena o le tulaga e mafai ai ona tatou laasia ma faafaigofie ai a tatou finauga ina ia toso mai vaalele i Samoa nei ina ia saga atili tele ai ma tupu le faitauaofai o tagata e asiasi maimoa mai i Samoa ma faatupu tele ai le tamaoaiga ma maua ai galuega a tatou fanau.

Lau Afioga i le Fofoga Fetalai, ou te fautuaina ina ia tatou agai loa e auiliili le Tala Faatatau Faaopoopo o le Tupe.

FOFOGA FETALAI: Malo faafetai. Ua maea nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe (Nu.1) 2014/2015. Ma o le a tuuina atu loa le Fesili.

Na faamaonia le lafo na faatuina i le aso 16 Tesema 2014 ma faitauina ai le Tulafono Tau Faaofi o le Faatatauina o Tupe Faaopoopo (Nu.1) 2014/2015 i lona faitauga faalua.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2014/2015 – iloiloga auiliili**

FOFOGA FETALAI: O le a sagai atu loa le Fono Aoao i le iloiloga auiliili o le Tulafono Tau Faaofi o le Faatatauina o Tupe Faaopoopo (Nu.1) 2014/2015.

I le faagasologa o le iloiloga auiliili o le Tulafono Tau Faaofi e mafai ona saunoa faatepa sui usufono i mataupu o lo o tusia i le Pepa 2014/2015

Nu.157, Tala Faatatau o Tupe Faaopoopo Muamua o Tupe Maua ma Tupe Totogi a le Malo o Samoa mo le tausaga faaiuina aso 30 Iuni 2014.
E tusa ai ma Tulafono Tumau 134, e amata le iloiloga aulili o le Tulafono Tau Faaofi i ona Faamatatalaga.

**FAAMATALAGA MUAMUA
VAEGATUPE MA TALA FAATATAU
FAAOPOOPOGA I TUPE FAATATAUINA**

MATAGALUEGA	FAAMATALAGA	AOFAI TUPE ALU
FAATOAGA MA FAIGAFAIWA		\$230,926.

Faamaonia.

TUPE	\$6,575,636.
-------------	---------------------

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetatalai, na pau lava le mea ou te fia faatepa, o lena e manino mai ina vaegatupe ma galuega lagolago a Minisita ma Sui Minisita e \$115,717 ae le \$1 miliona e pei ona saunoa ai le Taitai o le Itu Agai.

Faamaonia le Vaegatupe e \$6,575,636 mo Tupe.

MATAUPU TAU LE VA I FAFO MA FEFAATAUAIGA	\$831,860.
---	-------------------

Faamaonia.

FAAMASINOGA MA PULEGA TAU FAAMASINOGA	\$395,000.
--	-------------------

Faamaonia.

PUNAOA FAANATURA MA LE SIOSIOMAGA

\$921,765.

FOFOGA FETALAI: Ia, saunoa mai le sui usufono.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Lau Afioga i le Fofoga Fetalai, e i ai lava si mea laitiiti lea e fia malamalama ai lou sui usufono, o le vaegatupe lea e \$50,000 lea e faapea mo auauanaga faa-technician o fanua, a o le Lipoti a le Komiti ma le saunoaga a le Minisita, mo le totogiina o le aufaigaluega ua maea. Na pau lava lea o si vaimea ou te fia malamalama ai, ou te iloa e fesoasoani mai le Afioga i le Minisita.

FOFOGA FETALAI: Tulai mai lau Afioga i le Minisita mo Punaoa Faanatura ma le Siosiomaga.

Tofa Hon FAAMOETAULOA FAALE TUMAALII (Minisita mo Punaoa Faanatura ma le Siosiomaga): Faafetai i lau Afioga i le Fofoaga Fetalai, faafetai foi mo le sui usufono mamalu mo le faafesili. O le \$50,000 lea ua totogi ai konekarate foi nei ua uma, i le tulaga lea, tusa o le tupe lea ua faauma ai le latou auauanaga. E pei o le tulaga lena o lea e i ai tamalii ia lea ua litaea nei. Ma le faaaloalo lava.

FOFOGA FETALAI: Malo faafetai.

Faamaonia le Vaegatupe e \$921,765 mo Punaoa Faanatura ma le Siosiomaga.

LEOLEO

\$636,000.

Faamaonia.

TUPE MAUA

\$387,000.

Faamaonia.

KOMESINA O SULUFAIGA

\$30,000.

Faamaonia.

OFISA O FUAINUMERA FAAMAUINA \$84,596.

Faamaonia.

GALUEGA TAU FALEPUIPUI & TOEFUATAIGA \$358,922.

Faamaonia.

FAALAPOTOPOTOGA FAAVAE \$70,000.
TAU FATUGAO A SAMOA

Faamaonia.

FAALAPOTOPOTOGA \$34,000.
O SUESUEGA FAASAIENISI
A SAMOA

Faamaonia.

PULEGA O FELAUAIGA \$234,600.
I LE LAUELEELE

Faamaonia.

AOFAI FAAOPOOPOGA I TUPE ALU \$10,790,305.
AOAO 2014/2015

Faamaonia.

**FAAMATALAGA LONA LUA
FAAITIITIGA I TUPE FAATATAUINA**

MATAGALUEGA FAAMATALAGA

**AOFAI TUPE
FAAITIITIA**

TUPE

(2,635,762).

Faamaonia.

AOFAI FAAITIITIGA AOAO I TUPE ALU 2014/2015

\$ (2,635,762)

Faamaonia.

FUAIUPU 2: Faamatuu atu ma le Faatatauina o le \$10,790,305 mai le Faaputugatupe a le Matagaluega o Tupe.

Faamaonia.

FUAIUPU 3: Faaitiitiga o aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.1) 2014/2015.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2014/2015 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2014/2015 – faitauga faatolu**

FOFOGA FETALAI: Tulai mai lau Afioga i le Minisita o Tupe.

**Susuga Hon TUILAEPA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2014/2015 i lona faitauga faatolu.*

Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TOLOPOINA

FOFOGA FETALAI: Ou te fiafia lava e faasilasila atu ua maea ona faagaso le Tulafono Tau Faaofi o le Faatatauina o Tupe Faaopoopo (Nu. 1) 2014/2015 i le Palemene ua potopoto ma ua faapea ona pasia le Fono Aoao Faitulafono.

Ia ou te manatu o lea ua taunu le tatou galuega i le taunuuga sa tatou faananau i ai, sa manatu lava e tuu atu pea le avanoa i Afioga i Minisita ona o le tulaga o le faapupulaina o le tatou faamoemoe, ae faafetai i le Atua o lea ua tini pao le uto e pei o le faiva i vai, tatou taunu foi i le taunuuga ua tatou i ai lenei aso puupuu, ia e momoli atu ai le faafetai tele i le paia ma le mamalu mauluga o le tatou Maota nei. O le agaga ma le faamoemoe, ia o le vave ona pasia le Tala o le Tupe, o le vave foi lea ona tuu atu i aao o Faauluuluga o Matagaluega ma le Malo aua le faatinoina o le latou galuega fai.

E faafetai atu i le faaaogagase o le tatou Maota i lenei aso ma lenei foi vaiaso, o lea ua tatou taunu i le taunuuga o le tatou aso mulimuli ia ma le faamoemoe e tatou te tauaoia faatasi i inei i le Aso Gafua ona o le faaauauina o a tatou galuega tuua, a o lea ua motu le tatou taamilosaga muamua, ua faatea le tulaga o le tatou Tala o le Tupe, ia ona tatou faifaimalie ai lea i nisi o tatou Tulafono Tau Faaofi ma Lipoti ua faataatia mai aua le tatou galuega mo le vaiaso fou.

E momoli atu le faafetai tele i le paia ma le mamalu o tamalii ma failauga, o Faauluuluga o Matagaluega o Faalapotopotoga a le Malo, ia faamalo lo outou onosai mai.

Samoa ua iu le galuega a lou Palemene i lenei vaiaso, faafetai atu le tapuai mai, faafetai tatalo i le Aufai Tatalo, ia papaaveloa la outou fatuaiga tausi, o le tapuaia o le faiva o lou Palemene aua le vaiaso fou. E manatu foi o lea e nofo ae olo lo tatou Malo i le tele o tuatuanoa na tuua i lenei vaiaso, ona o le usuia o le tatou Fono. O a fita ma faigata o galuega ma polokalame o totoe i lenei aso, ia aualiitia e le Atua lo outou soifua manuia. O a foi fuafuaga o le a tatou taupule i ai mo le faaiuga o lenei vaiaso, taimatalii i le Alii. E faamalulu

atu o le a leai se tatou taligasua, o le a sue le mea e taumafa ai le sui usufono i le afiafi lenei ua taumafai le tatou ofisa ae o lo o i ai nisi o tulaga o lo o gasolo mai atonu e maua ai se faamalositino.

Ia o lea a o le i tuua le tatou Fono i lenei aso, ou te tatalo atu i lau susuga i le feagaiga taulagi, o lou lava lea tiute o le tatalo i le tatou Maota Fono. Tulai mai se tasi o sui usufono mo Salega, Tofa Tapuai Toese Ah Sam e fai se tatou tatalo e faamanuia ai le tatou mafutaga.

Na tolopo Taualumaga a le Fono Aoao i le itula e 12:05 i le aoauli seia aulia le itula e 9:00 i le taeao o le Aso Gafua, 26 Ianuari 2015.